

---

gosvaamii tulasiiidaasa kRita kavitaavali

—  
गोस्वामी तुलसीदास कृत कवितावली  
—

Document Information



---

Text title : Kavitaavali

File name : Kavitaavali\_i.itx

Category : tulasIdAsa, raama, hindi

Location : doc\_z\_otherlang\_hindi

Author : Goswami Tulasidas

Transliterated by : Mr. Balram J. Rathore, Ratlam, M.P., a retired railway driver

Description-comments : Converted from ISCII to ITRANS

Acknowledge-Permission: Dr. Vineet Chaitanya, vc@iiit.net

Latest update : August 28, 2021

Send corrections to : sanskrit@cheerful.com

---

This text is prepared by volunteers and is to be used for personal study and research. The file is not to be copied or reposted without permission, for promotion of any website or individuals or for commercial purpose.

**Please help to maintain respect for volunteer spirit.**

---

Please note that proofreading is done using Devanagari version and other language/scripts are generated using **sanscript**.

---

January 21, 2023

*sanskritdocuments.org*

---



# गोस्वामी तुलसीदास कृत कवितावली



। १ ।

ॐ

श्रीसीतारामभ्यां नमः

कवितावली

बालकाण्ड

रेफ आत्मचिन्मय अकल, परब्रह्म पररूप।

हरि-हर-अज-वन्दित-चरन, अगुण अनीह अनूप ॥ १ ॥

बालकेलि दशरथ-अजिर, करत सो फिरत सभाय।

पदनखेन्दु तेहि ध्यान धरि विचरत तिलक बनाय ॥ २ ॥

अनिलसुवन पदपद्मरज, प्रेम सहित शिर धार ।

इन्द्रदेव टीका रचत, कवितावली उदार ॥ ३ ॥

बन्दौं श्रीतुलसीचरन नख, अनूप दुतिमाल ।

कवितावलि-टीका लसै कवितावलि-वरभाल ॥ ४ ॥

बालरूपकी झाँकी

अवधेसके द्वारें सकारें गई सुत गोद कै भूपति लै निकसे।

अवलोकि हौं सोच बिमोचनको ठगि-सी रही, जे न ठगे धिक-से ॥

तुलसी मन-रंजन रंजित-अंजन नैन सुखंजन-जातक-से।

सजनी ससिमें समसील उभै नवनील सरोरुह-से बिकसे ॥

पग नूपुर औ पहुँची करकंजनि मंजु बनी मनिमाल हिउँ।

नवनील कलेवर पीत झँगा झलकै पुलकै नृपु गोद लिएँ ॥

अरबिंदु सो आननु रूप मरंदु अनांदित लोचन-बृंग पिउँ।  
मनमो न बस्यो अस बालकु जौं तुलसी जगमें फलु कौन जिउँ॥

२

तनकी दुति स्याम सरोरुह लोचन कंचकी मंजुलताई हरैं।  
अति सुंदर सोहत धूरि भरे छवि भूरि अनंगकी दूरि धरैं ॥  
दमकैं दँतियाँ दुति दामिनि-ज्यौं किलकैं कल बाल-बिनोद करैं।  
अवधेसके बालक चारि सदा तुलसी-मन-मंदिरमें बिहरैं ॥

बाललीला

कबहूँ ससि मागत आरि करैं कबहूँ प्रतिबिंब निहारि डरैं।  
कबहूँ करताल बजाइकै नाचत मातु सबै मन मोद भरैं ॥  
कबहूँ रिसिआइ कहैं हठिकै पुनि लेत सोई जेहि लागि अरैं।  
अवधेसके बालक चारि सदा तुलसी-मन-मंदिरमें बिहरैं ॥  
बर दंतकी पंगति कंदकली अधराधर-पल्लव खोलनकी ।  
चपला चमकैं घन बीच जगैं छवि मोतिन माल अमोलनकी ॥

३

घुँघुरारि लटै लटकैं मुख ऊपर कुंडल लोल कपोलनकी ।  
नेवछावरि प्रान करै तुलसी बलि जाउँ लला इन बोलनकी ॥  
पदकंजनि मंजु बनीं पनहीं धनुहीं सर पंकज-पानि लिउँ।  
लरिका सँग खेलत डोलत हैं सरजू-तट चौहट हाट हिउँ॥  
तुलसी अस बालक-सों नहि नेहु कहा जप जोग समाधि किउँ।  
नर वे खर सूकर स्वान समान कहौ जगमें फलु कौन जिउँ॥  
सरजू बर तीरहि तीर फिरैं रघुवीर सखा अरु बीर सबै।  
धनुहीं कर तीर, निषंग कसैं कटि पीत दुकूल नवीन फबै ॥  
तुलसी तेहि औसर लावनिता दस चारि नौ तीन इकीस सबै।  
मति भारति पंगु भई जो निहारि बिचारि फिरी उपमा न पबै ॥

४

धनुर्यज्ञ

छोनीमेंके छोनीपति छाजै जिन्है छत्रछाया  
 छोनी-छोनी छाए छिति आए निमिराजके।  
 प्रबल प्रचंड बरिबंड बर बेष बपु  
 बरिबेकों बोले बैदेही बर काजके ॥  
 बोले बंदी बिरुद बजाइ बर बाजनेऊ  
 बाजे-बाजे बीर बाहु धुनत समाजके।  
 तुलसी मुदित मन पुर नर-नारि जेते  
 बार-बार हेरैं मुख औध-मृगराजके ॥

५

सियकें स्वयंबर समाजु जहाँ राजनिको  
 राजनके राजा महाराजा जानै नाम को।  
 पवनु, पुरंदरु, कृसानु, भानु, धनदु-से,  
 गुनके निधान रूपधाम सोमु कामु को ॥  
 बान बलवान जातुधानप सरीखे सूर  
 जिन्हकें गुमान सदा सालिम संग्रामको।  
 तहाँ दसरत्थकें समत्थ नाथ तुलसीके  
 चपरि चढायौ चापु चंद्रमाललामको ॥

मयनमहनु पुरदहनु गहन जानि  
 आनिकै सबैको सारु धनुष गढायो है।  
 जनकसदसि जेते भले-भले भूमिपाल  
 किये बलहीन, बल आपनो बढायो है ॥  
 कुलिस-कठोर कूर्मपीठतें कठिन अति  
 हठि न पिनाकु काहूँ चपरि चढायो है।  
 तुलसी सो रामके सरोज-पानि परसत ही  
 टूट्यौ मानो बारे ते पुरारि ही पढायो है ॥

६

डिगति उर्वि अति गुर्वि सर्व पब्वै समुद्र-सर।  
 ब्याल बधिर तेहि काल, बिकल दिगपाल चराचर ॥

दिग्गयंद लरखरत परत दसकंधु मुख भर ।  
सुर-बिमान हिमभानु भानु संघटत परसपर ॥  
चौंके बिरंचि संकर सहित, कोलु कमठु अहि कलमल्यौ ।  
ब्रह्मंड खंड कियो चंड धुनि जबहि राम सिवधनु दल्यौ ॥  
लोचनाभिराम घनस्याम रामरूप सिसु,  
सखी कहै सखीसों तूँ प्रेमपय पालि, री ।  
बालक नृपालजूकें ख्याल ही पिनाकु तोरु यो,  
मंडलीक-मंडली-प्रताप-दापु दालि री ॥  
जनकको, सियाको, हमारो, तेरो, तुलसीको,  
सबको भावती हैहै, मैं जो कह्यो कालि, री ।  
कौसिलाकी कोखपर तोषि तन वारिये, री  
राय दशरत्थकी बलैया लिजै आलि री ॥

७

दूब दधि रोचनु कनक थार भरि भरि  
आरति सँवारि बर नारि चलीं गावती ।  
लीन्हें जयमाल करकंज सोहैं जानकीके  
पहिरावो राघोजूको सखियाँ सिखावतीं ॥  
तुलसी मुदित मन जनकनगर-जन  
झाँकतीं झरोखें लागीं सोभा रानीं पावतीं ।  
मनहुँ चकोरीं चारु बैठीं निज निज नीड  
चंदकी किरनि पीवैं पलकौ न लावतीं  
नगर निसान बर बाजैं ब्योम दुंदुभीं  
बिमान चढि गान कैके सुरनारि नाचहीं ।  
जयति जय तिहुँ पुर जयमाल राम उर  
बरषैं सुमन सुर रूरे रूप राचहीं ॥  
जनकको पनु जयो, सबको भावतो भयो  
तुलसी मुदित रोम-रोम मोद माचहीं ।  
सावँरो किसोर गोरी सौभापर तन तोरी  
जोरी जियो जुग-जुग जुवती-जन जाचहीं ॥

८

भले भूप कहत भलें भदेस भूपनि सों  
 लोक लखि बोलिये पुनीत रीति मारिषी।  
 जगदंबा जानकी जगतपितु रामचंद्र,  
 जानि जियँ जोहौ जो न लागै मुँह कारखी ॥

देखे हैं अनेक ब्याह, सुने हैं पुरान बेद  
 बूझे हैं सुजान साधु नर-नारि पारिखी।  
 ऐसे सम समधी समाज न बिराजमान,  
 रामु-से न बर दुलही न सिय-सारिखी ॥

बानी बिधि गौरी हर सेसहूँ गनेस कही,  
 सही भरी लोमस भुसुंडि बहुबारिषो ।  
 चारिदस भुवन निहारि नर-नारि सब  
 नारदसों परदा न नारदु सो पारिखो।  
 तिन्ह कही जगमें जगमगति जोरी एक  
 दूजो को कहैया औ सुनैया चष चारखो।  
 रमा रमारमन सुजान हनुमान कही  
 सीय-सी न तीय न पुरुष राम-सारिखो ॥

९

दूलह श्रीरघुनाथु बने दुलही सिय सुंदर मंदिर माहीं।  
 गावति गीत सबै मिलि सुंदरि बेद जुवा जुरि बिप्र पढाहीं ॥

रामको रूप निहारति जानकी कंकनके नगकी परछाहीं।  
 यातें सबै सुधि भूलि गई कर टेकि रही पल टारत नाहीं ॥

परशुराम-लक्ष्मण-संवाद  
 भूपमंडली प्रचंड चंडीस-कोदंडु खंड्यो,  
 चंड बाहुदंडु जाको ताहीसों कहतु हौं।  
 कठिन कुठार-धार धरिबेको धीर ताहि,  
 बीरता बिदित ताको देखिये चहतु हौं ॥

तुलसी समाजु राज तजि सो बिराजै आजु,  
 गाज्यौ मृगराजु गजराजु ज्यों गहतु हौं।

छोनीमें न छाड्यौ छप्यो छोनिपको छोना छोटी,  
छोनिप छपन बाँको बुरुद बहतु हौं ॥

१०

निपट निदरि बोले बचन कुठारपानि,  
मानी त्रास औनिपनि मानो मौनता गही।  
रोष माखे लखनु अकनि अनखोही बातें,  
तुलसी बिनीत बानी बिहसि ऐसी कही ॥

सुजस तिहारें भरे भुअन भृगुतिलक,  
प्रगट प्रतापु आपु कद्यो सो सबै सही।  
टूट्यौ सो न जुरैगो सरासनु महेसजूको,  
रावरी पिनाकमें सरीकता कहाँ रही ॥

गर्भके अर्भक काटनकों पटु धार कुठारु कराल है जाको।  
सोई हौं बूझत राजसभा 'धनु को दल्यौ' हौं दलिहौ बलु ताको ॥  
लघु आनन उत्तर देत बडे लरिहै मरिहै करिहै कछु साको।  
गोरो गरूर गुमान भर् यो कहौ कौसिक छोटो-सो ढोटो है काको ॥

मखु राखिवेके काज राजा मेरे संग दए,  
दले जातुधान जे जितैया बिबुधेसके।

११

गौतमकी तीय तारी, मेटे अघ भूरि भार,  
लोचन-अतिथि भए जनक जनेसके ॥

चंड बाहुदंड-बल चंडीस-कोदंडु खंड्यो  
ब्याही जानकी, जीते नरेस देस-देसके।

साँवरे-गोरे सरीर धीर महावीर दोऊ,  
नाम रामु लखनु कुमार कोसलेसके ॥

काल कराल नृपालन्हके धनुभंगु सुनै फरसा लिपँ धाए।  
लखनु रामु बिलोकि सप्रेम महारिसतें फिरि आँखि दिखाए ॥  
धीरसिरोमनि वीर बडे विनयी विजयी रघुनाथु सुहाए।

लायक हे भृगुनायक, से धनु-सायक सौंपि सुभायँ सिधाए ॥  
(इति बालकाण्ड)

अयोध्याकाण्ड

१२

वन-गमन

कीरके कागर ज्यों नृपचीर, विभूषन उप्पम अंगनि पाई।  
औध तजी मगवासके रूख ज्यों पंथके साथ ज्यों लोग लोगाई ॥  
संग सुबंधु, पुनीत प्रिया, मनो धर्मु क्रिया धरि देह सुहाई।  
राजिवलोचन रामु चले तजि बापको राजु बटाउ कीं नाई ॥  
कागर कीर ज्यों भूषन-चीर सरीरु लस्यो तजि नीरु ज्यों काई।  
मातु-पिता प्रिय लोग सबै सनमानि सुभायँ सनेह सगाई ॥  
संग सुभामिनि, भाइ भलो, दिन द्वै जनु औध हुते पहुनाई।  
राजिवलोचन रामु चले तजि बापको राजु बटाउ कीं नाई ॥

१३

सिथिल सनेह कहैं कौसिला सुमित्राजू सों,  
मैं न लखी सौति, सखी ! भगिनी ज्यों सेई है।  
कहै मोहि मैया, कहौं-मैं न मैया, भरतकी,  
बलैया लेहौं भैया, तेरी मैया कैकेई है ॥  
तुलसी सरल भायँ रघुरायँ माय मानी,  
काय-मन-बानीहूँ न जानी कै मतेई है।  
बाम विधि मेरो सुखु सिरिस-सुमन-सम,  
ताको छल-छुरी कोह-कुलिस लै टेई है ॥  
कीजै कहा, जीजी जू! सुमित्रा परि पायँ कहै,  
तुलसी सहावै विधि, सोई सहियतु है  
रावरो सुभाऊ रामजन्म ही तें जानियत,  
भरतकी मातु को कि ऐसो चाहियतु है ॥

जाई राजघर, ब्याहि आई राजघर माहँ  
 राज-पूतु पाएहूँ न सुखु लहियतु है।  
 देह सुधागेह, ताहि मृगहूँ मलीन कियो,  
 ताहू पर बाहु विनु राहु गहियतु है॥

१४

गुहका पादप्रक्षालन

नाम अजामिल-से खल कोटि अपार नदीं भव बूढत काढे।  
 जो सुमिरें गिरि मेरु सिलाकन होत, अजाखुर बारिधि बाढे॥  
 तुलसी जेहि के पद पंकज तें प्रगटी तटिनी, जो हरै अघ गाढे।  
 ते प्रभू या सरिता तरिबे कहूँ मागत नाव करारे है ठाढे॥  
 एहि घाटतें थोरिक दूरि अहै कटि लौं जलु थाह देखाइहौं जू।  
 परसें पगधूरि तरै तरनी, घरनी घर क्यों समुझाइहौं जू॥  
 तुलसी अवलंबु न और कछू लरिका केहि भाँति जिआइहौंजू।  
 बरु मारिए मोहि, बिना पग धोएँ हौं नाथ न नाव चढाइहौं जू॥  
 रावरे दोषु न पायनको, पगधूरिको भूरि प्रभाउ महा है।  
 पाहन तें बन-बाहन काठको कोमल है, जलु खाइ रहा है ।

१५

पावन पाय पखारि कै नाव चढाइहौं, आयसु होत कहा है।  
 तुलसी सुनि केवटके बर बैन हँसे प्रभु जानकी ओर हहा है॥  
 पात भरी सहरी, सकल सुत बारे-बारे,  
 केवटकी जाति, कछु बेद न पढाइहौं।  
 सब परिवारु मेरो याहि लागि, राजा जू  
 हौं दीन बित्तहीन, कैसें दूसरी गढाइहौं॥  
 गौतमकी घरनी ज्यों तरनी तरैगी मेरी,  
 प्रभुसों निषादु है कै बादु ना बढाइहौं।  
 तुलसीके ईस राम, रावरे सों साँची कहौं,  
 बिना पग धोएँ नाथ, नाव ना चढाइहौं॥

जिन्हको पुनीत बारि धारैं सरपै पुरारि,  
त्रिपथगामिनि जसु बेद कहैं गाइकै।  
जिन्हको जोगीन्द्र मुनिबुंद देव देह दमि,  
करत विविध जोग-जप मनु लाइकै ॥

१६

तुलसी जिन्हकी धूरि परसि अहल्या तरी,  
गौतम सिधारे गृह गौनो सो लेवाइकै।  
तेई पाय पाइकै चढाइ नाव धोए बिनु,  
ख्वैहौं न पठावनी कै ह्वैहौं न हँसाइ कै ॥

प्रभुरुख पाइ कै, बोलाइ बालक घरनिहि,  
बंदि कै चरन चहूँ दिसि बैठे घेरि-घेरि।  
छोटो-सो कठौता भरि आनि पानी गंगाजूको,  
धोइ पाय पीअत पुनीत बारि फेरि-फेरि ॥

तुलसी सराहैं ताको भागु, सानुराग सुर  
बरषैं सुमन, जय-जय कहैं टेरि टेरि।  
विविध सनेह-सानी बानी असयानी सुनि,  
हँसै राघौ जानकी-लखन तन हेरि-हेरि ॥

वनके मार्गमें

पुरतें निकसी रघुबीरबधू धरि धीर दए मगमें डग द्वै।  
झलकीं भरि भाल कनीं जलकी, पुट सूखि गए मधूराधर वै ॥

१७

फिरि बूझति है, चलनो अब केतिक, पर्नकुटी करिहौ किते है?  
तियकी लखि आतुरता पियकी अँखियाँ अति चारु चलीं जल चै ॥

जलको गए लखनु, हैं लरिका  
परिखौ, पिय! छाँह घरीक है ठाढे।

पोंछि पसेउ बयारि करौं,  
अरु पाय पखारिहौं भूभुरि-डाढे ॥

तुलसी रघुबीर प्रियाश्रम जानि कै

बैठि बिलंब लौं कंटक काढे ।  
 जानकीं नाहको नेहु लख्यो,  
 पुलको तनु, बारि बिलोचन बाढे ॥  
 ठाढे हैं नवद्रुमडार गहें,  
 धनु काँधे धरें, कर सायकु लै ।  
 बिकटी भृकुटी, बडरी अँखियाँ,  
 अनमोल कपोलन की छबि है ॥  
 तुलसी अस मूर्ति आनु हिणँ,  
 जड! डारु धौं प्रान निछावरि कै ।

१८

श्रम सीकर साँवरि देह लसै,  
 मनो रासि महा तम तारकमै ॥  
 जलजनयन ,जलजानन जटा है सिर,  
 जौबन-उमंग अंग उदित उदार हैं  
 साँवरे-गोरेके बीच भामिनी सुदामिनी-सी,  
 मुनिपट धारैं, उर फूलनिके हार हैं ॥  
 करनि सरासन सिलीमुख, निषंग कटि,  
 अति ही अनूप काहू भूपके कुमार हैं ।  
 तुलसी बिलोकि कै तिलोकके तिलक तीनि  
 रहे नरनारि ज्यों चितेरे चित्रसार हैं ॥  
 आगें सोहै साँवरो कुँवरु गोरो पाछें-पाछें,  
 आछे मुनिबेष धरें, लाजत अनंग हैं ।  
 बान बिसिषासन, बसन बनही के कटि  
 कसे हैं बनाइ, नीके राजत निषंग हैं ॥

१९

साथ निसिनाथमुखी पाथनाथनंदिनी-सी,  
 तुलसी बिलोकें चितु लाइ लेत संग हैं ।  
 आनन्द उमंग मन,जौबन-उमंग तन,  
 रूपकी उमंग उमगत अंग -अंग है ॥

सुन्दर बदन, सरसीरुह सुहाए नैन,  
 मंजुल प्रसून माथें मुकुट जटनि के।  
 अंसनि सरासन, लसत सुचि सर कर,  
 तून कटि मुनिपट लूटक पटनि के ॥  
 नारि सुकुमारि संग, जाके अंग उबटि कै,  
 बिधि बिरचै बरूथ बिद्युतछटनि के।  
 गोरेको बरनु देखें सोनो न सलोनो लागे,  
 साँवरे बिलोकें गर्ब घटत घटनि के ॥  
 बलकल-बसन, धनु-वान पानि, तून कटि,  
 रूपके निधान घन-दामिनी-बरन हैं।  
 तुलसी सुतीय संग, सहज सुहाए अंग,  
 नवल कँवलहू तें कोमल चरन हैं ॥

२०

औरै सो बसंतु, और रति, औरै रतिपति,  
 मूरति बिलोकें तन-मनके हरन हैं।  
 तापस बेपै बनाइ पथिक पथें सुहाइ,  
 चले लोकलोचननि सुफल करन हैं ॥  
 बनिता बनी स्यामल गौरके बीच,  
 बिलोकहु, री सखि! मोहि-सी है।  
 मगजोगु न कोमल, क्यों चलिहै,  
 सकुचाति मही पदपंकज छवै ॥  
 तुलसी सुनि ग्रामबधू बिथकीं,  
 पुलकीं तन, औ चले लोचन चै।  
 सब भाँति मनोहर मोहनरूप  
 अनूप हैं भूपके बालक द्वै ॥  
 साँवरे-गोरे सलोनो सुभायँ, मनोहरताँ जिति मैनु लियो है।  
 बान-कमान, निषंग कसैं, सिर सोहैं जटा, मुनिबेष कियो है ॥

२१

संग लिएँ बिधुबैनी बधू, रतिको जेहि रंचक रुपु दियो है।  
 पायन तौ पनहीं न, पयादेँहि क्यों चलिहैं, सकुचात हियो है ॥  
 रानी मैं जानी अयानी महा, पवि-पाहनहू तें कठोर हियो है।  
 राजहुँ काजु अकाजु न जान्यो, कद्यो तियको जेहिँ कान कियो है ॥  
 ऐसी मनोहर मूरति ए बिछुरें कैसे प्रीतम लोगु जियो है।  
 आँखिनमें सखि! राखिबे जोगु, इन्हैं किमि कै बनवासु दियो है ॥  
 सीस जटा, उर- बाहु बिसाल, बिलोचन लाल, तिरीछी सी भौहैं।  
 तून सरासन-बान धरें तुलसी बन-मारगमें सुठि सोहैं ॥  
 सादर बारहिँ बार सुभायँ चितै तुम्ह त्यों हमरो, मनु मोहैं।  
 पूँछत ग्रामबधू सिय सों, कहौ, साँवरे-से सखि! रावरे को हैं ॥  
 सुनि सुंदर बैन सुधारस-साने सयानी हैं जानकीं जानी भली।  
 तिरछे करि नैन, दै सैन तिन्हैं समुझाइ कछू मुसुकाइ चली ॥

२२

तुलसी तेहि औसर सोहैं सबै अवलोकति लोचनलाहु अलीं।  
 अनुराग-तडागमें भानु उदैँ विगसी मनो मंजुल कंजकलीं  
 धरि धीर कहैं, चलु, देखिअ जाइ, जहाँ सजनी! रजनी रहिहैं।  
 कहिहै जगु पोच, न सोचु कछू फलु लोचन आपन तौ लहिहैं  
 सुखु पाइहैं कान सुनेँ बतियाँ कल, आपुसमें कछु पै कहिहैं।  
 तुलसी अति प्रेम लगीं पलकैं, पुलकीं लखी रामु हि ए महि हैं ॥  
 पद कोमल, स्यामल-गौर कलेवर राजत कोटि मनोज लजाएँ।  
 कर बान-सरासन, सीस जटा, सरसीरुह-लोचन सोन सुहाएँ ॥  
 जिन्ह देखे सखी! सतिभायहु तें तुलसी तिन्ह तौ मन फेरि न पाए।  
 एहिँ मारग आजु किसोर बधू बिधुबैनी समेत सुभायँ सिधाए ॥

२३

मुखपंकज, कंजबिलोचन मंजु, मनिज-सरासन-सी बनी भौहैं।  
 कमनीय कलेवर कोमल स्यामल-गौर किसोर, जटा सिर सोहैं ॥  
 तुलसी कटि तून, धरें धनु बान, अचानक दिष्टि परी तिरछौहैं।

केहि भाँति कहौं सजनी! तोहि सों मृदु मूरति द्वै निवसीं मन मोहैं ॥

वनमें

प्रेम सों पीछें तिरीछें प्रयाहि चितै चितु दै चले लै चितु चौरैं।

स्याम सरीर पसेउ लसै हुलसै 'तुलसी' छबि सो मन मौरैं ॥

लोचन लोल, वलै भृकुटी कल काम कमानहु सो तनु तौरैं।

राजत रामु कुरंगके संग निषंगु कसे धनुसों सरु जौरैं ॥

सर चारिक चारु बनाइ कसे कटि, पानि सरासनु सायकु लै।

बन खेलत रामु फिरै मृगया, 'तुलसी' छबि सो बरनै किमि कै ॥

अवलोकि अलौकिक रूपु मृगीं मृग चौंकि चकै, चतवैं चितु दै।

न डगै, न भगै जियँ जानि सिलीमुख पंच धरै रति नायकु है ॥

२४

बिंधिके बासी उदासी तपी ब्रतधारी महा विनु नारि दुखारे।

गौतमतीय तरी 'तुलसी' सो कथा सुनि भे मुनिबृंद सुखारे ॥

हैंहैं सिला सब चंद्रमुखीं परसें पद मंजुल कंज तिहारे।

कीन्ही भली रघुनायकजु! करुना करि काननको पगु धारे ॥

(इति अयोध्याकाण्ड)

अरण्यकाण्ड

मारीचानुधावन

पंचवटीं बर पर्नकुटी तर बैठे हैं रामु सुभायँ सुहाए।

सोहै प्रिया, प्रिय बंधु लसै, 'तुलसी' सब अंग घने छबि छाए ॥

देखि मृगा मृगनैनी कहे प्रिय बैन ,ते प्रीतमके मन भाए।

हेमकुरंगके संग सरासनु सायकु लै रघुनायकु धाए ॥

(इति अरण्यकाण्ड)

॥ ।

२५

किष्किन्धाकाण्ड

समुद्रोल्लङ्घन

जब अङ्गदादिनकी मति-गति मंद भई,  
 पवनके पूतको न कूदिवेको पलु गो।  
 साहसी है सैलपर सहसा सकेलि आइ,  
 चितवत चहूँ ओर, औरनि को कलु गो ॥  
 'तुलसी' रसातलको निकसि सलिलु आयो,  
 कोलु कलमल्यो, अहि-कमठको बलु गो।  
 चारिहू चरनके चपेट चाँपेँ चिपिटि गो,  
 उचकेँ उचकि चारि अंगुल अचलु गो ॥  
 (इति किष्किन्धाकाण्ड)

२६

सुन्दरकाण्ड

अशोकवन

बासव-बरुन विधि-वनतें सुहावनो,  
 दसाननको काननु बसंतको सिंगारु सो।  
 समय पुराने पात परत, डरत बातु,  
 पालत लालत रति-मारको बिहारु सो ॥  
 देखें बर बापिका तडाग बागको बनाउ,  
 रागबस भो विरागी पवनकुमारु सो।  
 सीयकी दसा बिलोखि बिटप असोक तर,  
 'तुलसी' बिलोक्यो सो तिलोक-सोक-सारु सो ॥  
 माली मेघमाल, बनपाल विकराल भट,  
 नीकेँ सब काल सीचैँ सुधासार नीरके।  
 मेघनाद तें दुलारो, प्रान तें पियारो बागु,  
 अति अनुरागु जियँ जातुधान धीर केँ ॥  
 'तुलसी' सो जानि-सुनि, सीयको दरसु पाइ,  
 पैठो बाटिकाँ बजाइ बल रघुबीर केँ।

विद्यमान देखत दसाननको काननु सो  
तहस-नहस कियो साहसी समीर कें ॥

२७

लंकादहन

बसन बटोरि बोरि-बोरि तेल तमीचर,  
खोरि- खोरि धाइ आइ बाँधत लँगूर हैं।  
तैसो कपि कौतुकी देरात ढीले गात कै-कै,  
लातके अघात सहै, जीमें कहै, कूर हैं ॥

बाल किलकारी कै-कै, तारी दै-दै गारी देत,  
पाछें लागे, बाजत निसान ढोल तूर हैं।  
बालधी बढन लागी, ठौर- ठौर दीन्ही आगी,  
बिधिकी दवारि कैधौं कोटिसत सूर हैं ॥

लाइ- लाइ आगि भागे बालजाल जहाँ तहाँ,  
लघु है निबुक गिरि मेरुतें बिसाल भो।  
कौतुकी कपीसु कूदि कनक-कँगूरौं चढ्यो,  
रावन-भवन चढि ठाढो तेहि काल भो ॥

'तुलसी' विराज्यो ब्योम बालधी पसारि भारी,  
देखें हहरात भट, कालु सो कराल भो।

२८

तेजको निधानु मानो कोटिक कृसानु-भानु,  
नख विकराल, मुखु तेसो रिस लाल भो ॥

२८

बालधी बिसाल विकराल, ज्वालजाल मानो  
लंक लीलिवेको काल रसना पसारी है।

कैधौं ब्योमबीथिका भरे हैं भूरि धूमकेतु,  
बीररस बीर तरवारि सो उधारी है ॥

'तुलसी' सुरेस-चापु, कैधौं दामिनि-कलापु,  
कैधौं चली मेरु तें कृसानु-सरि भारी है।  
देखें जातुधान-जातुधानीं अकुलानी कहैं,

काननु उजार् यो, अब नगरू प्रजारिहै ॥  
 जहाँ-तहाँ बुबुक बिलोकि बुबुकारी देत,  
 जरत निकेत, धावौ, धावौ लागी आगि रे।  
 कहाँ तातु-मातु, भ्रात-भगिनी, भामिनी-भाभी,  
 ढोठा छोटे छोहरा अभागे भोंडे भागि रे ॥

२९

हाथी छोरौ, घोरा छोरौ, महिष-वृषभ छोरौ,  
 छेरी छोरौ, सो वैसो जगावै, जागि, जागि रे।  
 'तुलसी' बिलोकि अकुलानी जातुधानीं कहैं,  
 बार-बार कह्यौं, पिय! कपिसों न लागि रे ॥  
 देखि ज्वालाजालु, हाहाकारु दसकंध सुनि,  
 कह्यो, धरो, धरो, धाए वीर बलवान हैं।  
 लिएँ सूल-सेल, पास-परिघ, प्रचंड दंड,  
 भाजन सनीर, धीर धरें धनु-बान हैं ॥  
 'तुलसी' समिध सौंज, लंक जग्यकुंडु लखि,  
 जातुधानपुंगीफल जव तिल धान हैं।  
 स्रवा सो लँगूल, बलमूल प्रतिकूल हबि,  
 स्वाहा महा हाँकि हाँकि हुनैं हनुमान हैं ॥  
 गाज्यो कपि गाज ज्यौं, बिराज्यो ज्वालजालजुत,  
 भाजे वीर धीर, अकुलाइ उठ्यो रावनो।  
 धावौ, धावौ, धरौ, सुनि धाए जातुधान धारि,  
 बारिधारा उलदै जलदु जौन सावनो ॥

३०

लपट- झपट झहराने, हहराने बात,  
 भहराने भट, पर् यो प्रबल परावनो।  
 ढकनि ढकेलि, पेलि सचिव चले लै ठेलि,  
 नाथ! न चलैगो बलु, अनलु भयावनो ॥  
 बड़ो बिकराल बेषु देखि, सुनि सिंघनादु,

उठ्यो मेघनादु, सबिषाद कहै रावनो।  
 बेग जित्यो मारुतु, प्रताप मारतंड कोटि,  
 कालऊ करालताँ, बडाई जित्यो बावनो ॥  
 'तुलसी' सयाने जातुधान पछिताने कहैं,  
 जाको ऐसो दूतु, सो तो साहेबु अबै आवनो।  
 काहेको कुसल रोषे राम वामदेवहू की,  
 विषम बलीसों बादि बैरको बढावनो ॥  
 पानी! पानी! पानी! सब रानि अकुलानी कहैं,  
 जाति हैं परानी, गति जानी गजचालि है।

३१

बसन विसारैं, मनिभूषन सँभारत न,  
 आनन सुखाने, कहैं, क्योंहू कोऊ पालिहै ॥  
 'तुलसी' मँदोवै मीजि हाथ, धुनि माथ कहै,  
 काहूँ कान कियो न, मैं कह्यो केतो कालि है।  
 बापुरें विभीषन पुकारि बार-बार कह्यो,  
 बानरु बडी बलाइ घने घर घालिहै ॥  
 काननु उजार् यो तो उजार् यो, न बिगार् यो कछु,  
 बानरु बेचारो बाँधि आन्यो हठि हारसों।  
 निपट निडर देखि काहू न लख्यो विसेषि,  
 दीन्हो ना छडाइ कहि कुलके कुठारसों ॥  
 छोटे औ बडरे मेरे पूतऊ अनेरे सब,  
 साँपनि साँ खेलैं, मेलैं गरे छुराधार सों।  
 'तुलसी' मँदोवै रोइ-रोइ कै बिगोवे आपु,  
 बार-बार कह्यो मैं पुकारि दाढीजारसों ॥

३२

रानी अकुलानी सब डाढत परानी जाहिं,  
 सकैं न बिलोकि बेषु केसरीकुमारको।  
 मीजि-मीजि हाथ, धुनै माथ दसमाथ-तिय,  
 "तुलसी" तिलौ न भयो बाहेर अगारको ॥

सबु असबाबु डाढो, मैं न काढो, तैं न काढो,  
जियकी परी, सँभारै सहन-भँडार को।  
खीझति मँदोवै सविषाद देखि मेघनादु,  
बयो लुनियत सब याही दाढीजारको ॥

रावन की रानी बिलखानी कहै जातुधानी,  
हाहा! कोऊ कहे बीसबाहु दसमाथसों।  
काहे मेघनाद! काहे,काहे रे महोदर! तूँ  
धीरजु न देत, लाइ लेत क्यों न हाथसों ॥

काहे अतिकाय! काहे, काहे रे अकंपन!  
अभागे तीय त्यागे भोंडे भागे जात साथ सों।  
'तुलसी' बढ़ाई बादि सालतें बिसाल बाहैं,  
याहीं बल बालिसो बिरोधु रघुनाथसों ॥

३३

हाट-बाट,कोट-कोट, अटनि, अगार,पौरि,  
खोरि-खोरि दौरि-दौरि दीन्ही अति आगि है।  
आरत पुकारत, सँभारत न कोऊ काहू,  
ब्याकुल जहाँ सो तहाँ लोक चले भागि हैं  
बालधी फिरावै, बार-बार झहरावै, झरैं  
बुँदिया-सी लंक पधिलाइ पाग पागिहै।  
'तुलसी' बिलोकि अकुलानी जातुधानी कहैं,  
चित्रहू के कपि सों निसाचरु न लागिहै ॥

लगी, लागी आगि, भागि-भागि चले जहाँ -जहाँ,  
धीयको न माय, बाप पूत न सँभारहीं।  
छूटे बार,बसन उघारे, धूम-धुंध अंध,  
कहैं बारे-बूढ़े 'वारि',वारि' बार बारहीं ॥

हय हिहिनात, भागे जात घहरात गज,  
भारी भीर ठेलि-पेलि रौंदि-खौंदि डारहीं।  
नाम,लै चिलात, बिललात, अकुलात अति,  
'तात तात! तौंसिअत, झौंसिअत, झारहीं ॥

३४

लपट कराल ज्वालजालमाल दहूँ दिसि,  
धूम अकुलाने, पहिचानै कौन काहि रे।  
पानीको ललात बिललात, जरे गात जात  
परे पाइमाल जात भ्रात! तूँ निबाहि रे ॥

प्रिया तूँ पराहि, नाथ! नाथ! तू पराहि, बाप !  
बाप तूँ पराहि, पूत! पूत! तूँ पराहि रे ॥  
'तुलसी' बिलोकी लोग ब्याकुल बेहाल कहैं,  
लेहि दससीस अब बीस चख चाहि रे ॥

बीथिका-बजार प्रति, अटनि अगार प्रति,  
पवरि-पगार प्रति बानरु बिलोकिए।  
अध-ऊर्ध बानर, बिदसि-दिसि बानरु है,  
मानो रह्यो है भरि बानरु तिलोकिएँ ॥

मूँदैं आँखि हियमें, उघारें आँखि आगें ठाढ़ो,  
धाइ जाइ जहाँ-तहाँ, और कोऊ कोकिए।  
लेहु, अब लेहु तब कोऊ न सिखावो मानो,  
सोई सतराइ जाइ जाहि-जाहि रोकिए ॥

३५

एक करैं धौंज, एक कहैं काढौ सौंज, एक  
औंजि, पानी पीकै कहैं, बनत न आवननो।  
एक परे गाढे एक डाढत हीं काढे, एक  
देखत हैं ठाढ़े, कहैं, पावकु भयावनो ॥

'तुलसी' कहत एक 'नीकें हाथ लाए कपि,  
अजहूँ न छाड़ै बालु गालको बजावनो'।  
'धाओ रे, बुझाओ रे', कि बावरे हौ रावरे, या  
औरै आगि लागी न बुझावै सिंधु सावनो ॥

कोऽपि दसकंध तब प्रलय पयोद बोले,  
रावन-रजाइ धाए आइ जूथ जोरि कै।  
कह्यो लंकपति लंक बरत, बुताओ बेगि,

वानरु बहाइ मारौ महावीर बोरि कै ॥

'भलें नाथ!' नाइ माथ चले पाथप्रदनाथ,  
 बरषैं मुसलधार बार-बार घोरि कै।  
 जीवनतें जागी आगी, चपरि चौगुनी लागी  
 'तुलसी' भभरि मेघ भागे मुखु मोरि कै

३६

इहाँ ज्वाल जरे जात, उहाँ ग्लानि गरे गात,  
 सूखे सकुचात सब कहत पुकार है ॥

'जुग षट भानु देखे प्रलयकृसानु देखे,  
 सेष-मुख-अनल बिलोके बार-बार हैं ॥

'तुलसी'सुन्यो न कान सलिलु सर्पी-समान,  
 अति अचिरिजु कियो केसरीकुमार है।

बारिद बचन सुनि धुने सीस सचिवन्ह,  
 कहैं दससीस! 'ईस-बामता-विकार हैं

'पावकु, पवनु, पानी, भानु, हिमवानु, जमु,  
 कालु, लोकपाल मेरे डर डावाँडोल हैं।

साहेबु महेसु सदा संकित रमेसु मोहिं  
 महातप साहस बिरंचि लीन्हें मोल हैं ॥

'तुलसी' तिलोक आजु दूजो न विराजै राजु,  
 बाजे-बाजे राजनिके बेटा-बेटी ओल हैं।

को है ईस नामको, जो बाम होत मोहसे को,  
 मालवान! रावरेके बावरे-से बोल हैं ॥

३७

भूमि भूमिपाल, ब्यालपालक पताल, नाक-  
 पाल, लोकपाल जेते, सुभट-समाजु है।

कहै मालवान, जातुधानपति ! रावरे को  
 मनहूँ अकाजु आनै, ऐसो कौन आजु है ॥

रामकोहु पावकु, समीरु सिय-स्वासु, कीसु,  
 ईस-बामता बिलोकु, बानरको ब्याजु है।

जारत पचारि फेरि-फेरि सो निसंक लंक,  
जहाँ बाँको बीरु तोसो सूर-सिरताजु है ॥

पान-पकवान विधि नाना के, सँधानो, सीधो,  
बिबिध बिधान धान बरत बखारहीं।  
कनककिरीट कोटि पलँग, पेटारे, पीठ  
काढत कहार सब जरे भरे भारहीं ॥

प्रबल अनल बाढे जहाँ काढे तहाँ डाढे,  
झपट-लपट बरे भवन-भँडारहीं।

३८

'तुलसि' अगारु न पगारु न बजारु बच्यो,  
हाथी हथसार जरे घोरे घोरसारहीं ॥

हाट-बाट हाटकु पिघलि चलो घी-सो घनो,  
कनक-कराही लंक तलफति तायसों ॥

नानापकवान जातुधान बलवान सब  
पागि पागि ढेरी कीन्ही भलीभाँति भायसों ॥

पाहुने कृसानु पवमानसों परोसो, हनुमान  
सनमानि कै जेंवाए चित-चायसों।  
'तुलसी' निहारि अरिनारि दै-दै गारि कहैं  
बावरें सुरारि बैरु कीन्हौ रामरायसों ॥

रावन सो राजरोगु बाढत विराट-उर,  
दिनु-दिनु बिकल, सकल सुख राँक सो।  
नाना उपचार करि हारे सुर, सिध्द, मुनि,  
होत न बिसोक, औत पावै न मनाक सो ॥

रामकी रजाइतें रसाइनी समीरसूनु  
उतरि पयोधि पार सोधि सरवाक सो।

३९

जातुधान-बुट पुटपाक लंक-जातरूप-  
रतन जतन जारि कियो है मृगांक-सो ॥

सीताजीसे बिदाई

जारि-बारि, कै बिधूम, बारिधि बुताइ लूम,  
 नाइ माथो पगनि, भो ठाढो कर जोरि कै।  
 मातु! कृपा कीजे, सहिदानि दीजै, सुनि सीय  
 दीन्ही है असीस चारु चूडामनि छोरि कै ॥

कहा कहौ तात! देखे जात ज्यौं बिहात दिन,  
 बड़ी अवलंब ही, सो चले तुम्ह तोरि कै।  
 'तुलसी' सनीर नैन, नेहसो सिथिल बैन,  
 बिकल बिलोकि कपि कहत निहोरि कै ॥

'दिवस छ-सात जात जानिबे न, मातु! धरु  
 धीर, अरि-अंतकी अवधि रहि थोरिकै।

४०

बारिधि बँधाइ सेतु ऐहैं भानुकुलकेतु  
 सानुज कुसल कपिकटकु बटोरि कै ॥

बचन बिनीत कहि, सीताको प्रबोधु करि,  
 'तुलसी' त्रिकूट चढि कहत डफोरि कै।  
 जै जै जानकीस दससीस-करि-केसरी  
 कपीसु कूद्यो बात-घात उदधि हलोरि कै ॥

साहसी समीरसूनु नीरनिधि लंघि लखि  
 लंक सिध्दपीठु निसि जागो है मसानु सो।  
 'तुलसी' बिलोकि महासाहसु प्रसणन भई  
 देवी सीय-सारिखी, दियो है बरदानु सो ॥

बाटिका उजारि, अछधारि मारि, जारि गट्टु,  
 भानुकुलभानुको प्रतापभानु-भानु-सो।  
 करत बिसोक लोक-कोकनद, कोक कपि,  
 कहै जामवंत, आयो, आयो हनुमानु सो ॥

४१

गगन निहारि, किलकारी भारी सुनि,

हनुमान पहिचानि भए सानँद सचेत हैं  
 बूडत जहाज बच्यो पथिकसमाजु, मानो  
 आजु जाए जानि सब अंकमाल देत हैं ॥  
 जै जै जानकीस, जै जै लखन-कपीस' कहि,  
 कूदैं कपि कौतुकी नटत रेत- रेत हैं।  
 अंगदु मयंदु नलु नील बलसील महा  
 बालधी फिरावैं, मुख नाना गति लेत हैं ॥

आयो हनुमानु, प्रानहेतु अंकमाल देत,  
 लेत पगधूरि एक, चूमत लँगूल हैं।  
 एक बूझैं बार-बार सीय-समाचार, कहैं  
 पवनकुमारु, भो विगतश्रम-सूल हैं ॥  
 एक भूखे जानि, आगें आनैं कंद-मूल-फल,  
 एक पूजैं बाहु बलमूल तोरि फूल हैं।  
 एक कहैं 'तुलसी' सकल सिधि ताकें, जाकें  
 कृपा-पाथनात सीतानाथु सानुकूल हैं ॥

४२

सीयको सनेहु, सीलु, कथा तथा लंकाकी  
 कहत चले चायसों, सिरानो पथु छनमें।  
 कह्यो जुबराज बोलि बानरसमाजु, आजु  
 खाहु फल, सुनि पेलि पैठे मधुवनमें।  
 मारे बागवान, ते पुकारत देवान गे,  
 'उजारे बाग अंगद' देखाए घाय तनमें।  
 कहै कपिराजु, करि काजु आए कीस, तुल-  
 सीसकी सपथ कहामोदु मेरे मनमें ॥

भगवान् रामकी उदारता  
 नगरु कुबेरको सुमेरुकी बराबरी ,  
 बिरंचि-बुध्दिको बिलासु लंक निरमान भो।  
 ईसहि चढाइ सीस बीसबाहु बीर तहाँ,  
 रावनु सो राजा रज-तेजको निधानु भो ॥  
 'तुलसी' तिलोककी समृध्दि, सौंज, संपदा

सकेलि चाकि राखी, रासि, जाँगरु जहानु भो।  
 तीसरें उपास बनबास सिंधु पास सो  
 समाजु महाराजजू को एक दिन दानु भो  
 (इति सुन्दरकाण्ड)

लंकाकाण्ड

राक्षसोंकी चिन्ता

बड़े बिकराल भालु-बानर बिसाल बड़े,  
 'तुलसी' बड़े पहार लै पयोधि तोपिहैं।  
 प्रबल प्रचंड बरिबंड बाहुदंड खंडि  
 मंडि मेदिनीको मंडलीक-लीक लोपिहैं ॥  
 लंकदाहु देखें न उछाहु रह्यो काहुन को,  
 कहैं सब सचिव पुकारि पाँव रोपिहैं।  
 बाँचिहै न पाछैं तिपुरारिहू मुरारिहू के,  
 को है रन रारिको जौं कोसलेस कोपिहैं ॥

४४

त्रिजटाका आश्वासन

त्रिजटा कहति बार-बार तुलसीस्वरीसों,  
 'राघौ बान एकहीं समुद्र सातौ सोषिहैं।  
 सकुल सँघारि जातुधान-धारि जम्बुकादि,  
 जोगिनी-जमाति कालिकाकलाप तोषिहैं ॥  
 राजु दे नेवाजिहैं बजाइ कै बिभीषनै,  
 बजैंगे व्योम बाजने विबुध प्रेम पोषिहैं ॥  
 कौन दसकंधु, कौन मेघनादु बापुरो,  
 को कुंभकर्तु कीटु, जब रामु रन रोषिहैं ॥  
 बिनय-सनेह सों कहति सीय त्रिजटासों,  
 पाए कछु समाचार आरजसुवनके।  
 पाए जू बँधायो सेतु उतरे भानुकुलकेतु,

आए देखि-देखि दूत दारुन दुवनके ॥

बदन मलीन, बलहीन, दीन देखि, मानो  
मिटै घटै तमीचर-तिमिर भुवनके।  
लोकपति-कोक-सोक मूँदै कपि-कोकनद,  
दंड द्वै रहे हैं रघु-आदिति-उवनके ॥

४५

झूलना

सुभुजु मारीचु खरु त्रिसरु दूषनु बालि,  
दलत जेहिँ दूसरो सरु न साँध्यो।  
आनि परबाम विधि वाम तेहि रामसों,  
सकत संग्रामु दसकंधु काँध्यो ॥

समुझि तुलसीस-कपि-कर्म घर- घर घैरु,  
बिकल सुनि सकल पाथोधि बाँध्यो।  
बसत गढ बंक, लंकेसनायक अछत,  
लंक नहिँ खात कोउ भात राँध्यो ॥

‘बिस्वजयी’ भृगुनायक-से विनु हाथ भए हनि हाथ हजारी।  
बातुल मातुलकी न सुनी सिख का ‘तुलसी’ कपि लंक न जारी ॥  
अजहूँ तौ भलो रघुनाथ मिलें, फिरि बूझहै, को गज, कौन गजारी।  
कीर्ति बडो, करतूति बडो, जन-बात बडो, सो बडोई बजारी ॥

४६

जब पाहन भे बनबाहन-से उतरे बनरा, ‘जय राम’ रहैं।  
‘तुलसी’ लिएँ सैल-सिला सब सोहत, डसागरु ज्यों बल बारि बहै।  
करि कोपु करैं रघुवीरको आयसु, कौतुक हीं गढ कूदि चढ़ै।  
चतुरंग चमू पलमें दलि कै रन रावन-राढ-सुहाड गढ़ै ॥

बिपुल बिसाल बिकराल कपि-भालु, मानो  
कालु बहु बेष धरें, धाए किएँ करषा ।  
लिएँ सिला-सैल, साल, ताल औ तमाल तोरि  
तोपैं तोयनिधि, सुरको समाजु हरषा ॥

डगे दिगकुंजर कमठु कोलु कलमले,  
 डोले धराधर धारि, धराधरु धरषा।  
 'तुलसी'तमकि चलै, राघौकी सपथ करै,  
 को करै अटक कपिकटक अमरषा ॥

४७

आए सुकु, सारनु, बोलाए ते कहन लागे,  
 पुलक सरीर सेना करत फहम हीं।  
 'महाबली बानर बिसाल भालु काल-से  
 कराल हैं, रहैं कहाँ, समाहिंगे कहाँ मही' ॥  
 हँस्यो दसकंधु रघुनाथको प्रताप सुनि,  
 'तुलसी' दुरावे मुखु, सूखत सहम हीं।  
 रामके बिरोधें बुरो बिधि-हरि-हरहु को,  
 सबको भलो है राजा रामके रहम हीं ॥

अंगदजीका दूतत्व

'आयो! आयो! आयो सोई बानर बहोरि!' भयो  
 सोरु चहुँ ओर लंकाँ आएँ जुबराजके।  
 एक काढैं सौंज, एक धौंज करै, 'कहा ह्वैहै,  
 पोच भई, 'महासोचु सुभटसमाजके ॥  
 गाज्यो कपिराजु रघुराजकी सपथ करि,  
 मूँदै कान जातुधान मानो गाजें गाजके।

४८

सहमि सुखात बातजातकी सुरति करि,  
 लवा ज्यों लुकात, तुलसी झपेटें बाजके ॥  
 तुलसीस बल रघुबीरजू के बालिसुतु  
 वाहि न गनत, बात कहत करेरी-सी।  
 बकसीस ईसजू की खीस होत देखिअत,  
 रिस काहें लागति, कहत हौं मैं तरी-सी ॥  
 चढि गढ-मढ दढ, कोटकें कँगूरें, कोपि

नेकु धका देहैं,ढैहैं डेलनकी ढेरी-सी।

सनु दसमाथ !नाथ-णातके हमारे कपि

हाथ लंका लाइहैं तौ रहेगी हथेरी-सी ॥

दूषनु, बिराधु, खरु, त्रिसरा, कबंधु बधे

तालऊ बिसाल बेधे, कौतुक है कालिको।

एकहि बिसिष बस भयो बीर बाँकुरो सो,

तोहू है विदित बलु महाबली बालिको ॥

४९

'तुलसी' कहत हित मानतो न नेकु संक,

मेरो कहा जैहै, फलु पैहै तू कुचालिको।

बीर-करि-केसरी कुठारपानि मानी हारि,

तेरी कहा चली, बिड! तोसे गनै घालि को ॥

तोसों कहौं दसकंधर रे, रघुनाथ बिरोधु न कीजिए बौरै।

बालि बली, खरु, दूषन और अनेक गिरे जे-जे भीतिमें दौरै ॥

ऐसिअ हाल भई तोहि धौं, न तु लै मिलु सीय चहै सुखु जौं रे।

रामकें रोष न राखि सकैं तुलसी विधि, श्रीपति, संकरु सौ रे ॥

तूँ रजनीचरनाथ महा, रघुनाथके सेवकको जनु हौं हौं।

बलवान है स्वानु गलीं अपनीं, तोहि लाज न गालु बजावत सौहौं।

बीस भुजा, दस सीस हरौं, न डरौं, प्रभु-आयसु-भंग तें जौं हौं।

खेतमें केहरि ज्यो गजराज दलौं दल, बालिको बालकु तौं हौं ॥

५०

कोसलराजके काज हौं आजु त्रिकूट उपारि, लै बारिधि बोरौं।

महाभुजदंड द्वै अंडकटाह चपेटकीं चोट चटाक दै फोरौं ॥

आयसु भंगतें जौं न डरौं, सब मीजि सभासद श्रोनित घोरौं।

बालिको बालकु जौं, 'तुलसी' दसहू मुखके रनमें रद तोरौं

अति कोपसों रोष्यो है पाउ सभाँ, सब लंक ससंकित, सोरु मचा।

तमके घननाद-से बीर प्रचारि कै, हारि निसाचर-सैनु पचा ॥

न टरै पगु मेरुहु तें गरु भो, सो मनो महि संग बिरंचि रचा।

'तुलसी' सब सूर सराहत हैं, जगमें बलसालि है बालि-बचा ॥

रोप्यो पाउ पैज कै, विचारि रघुबीर बलु  
 लागे भट समिति, न नेकु टसकतु है ॥  
 तज्यो धीरु-धरनी, धरनीधर धसकत,  
 धराधरु धीर भारु सहि न सकतु है ॥  
 महाबली बालिकें दबत कलकति भूमि,  
 'तुलसी' उछलि सिंधु, मेरु मसकतु है।

५१

कमठ कठिन पीठि घट्टा परू यो मंदरको,  
 आयो सोई काम, पै करेजो कसकतु है ॥

रावण और मन्दोदरी

झूलना

कनकगिरिसुंग चढि देखि मर्कटकटकु,  
 बदत मंदोदरी परम भीता।  
 सहसभुज-मत्तगजराज-रनकेसरी  
 परसुधर गर्बु जेहि देखि बीता ॥

दास तुलसी समरसूर कोसलधनी,  
 ख्याल हीं बालि बलसालि जीता।  
 रे कंत ! तून दंत गहि 'सरन श्रीरामु' कहि,  
 अजहुँ एहि भाँति लै सौंपु सीता ॥

रे नीच! मारीचु विचलाइ, हति ताडका,  
 भंजि सिवचापु सुगु सुबहि दीन्ह्यो।  
 सहस दसचारि खल सहित खर-दूषनहि,  
 पैठै जमधाम, तैं तउ न चीन्ह्यो ॥

५२

मैं जो कहौं, कंत! सुनु मंतु भगवंतसों  
 विमुख है बालि फलु कौन लीन्ह्यो।  
 वीस भूज, दस सीस खीस गए तबहिं जब,  
 ईस के ईससों बैरु कीन्ह्यो ॥

बालि दलि, काल्हि जलजान पाषान किये,  
कंत ! भगवंतु तैं तउ न चीन्हें।

बिपुल बिकराल भट भालु-कपि काल -से,  
संग तरु तुंग गिरिसृंग लीन्हें ॥

आइगो कोसलाधीसु तुलसीस जेंहि  
छत्र मिस मौलि दस दूरि कीन्हें।  
ईस बकसीस जनि खीस करु, ईस! सुनु,  
अजहुँ कुलकुसल बैदेहि दीन्हें ॥

सैनके कपिन को को गनै, अर्बुदे  
महाबलबीर हनुमान जानी।  
भूलिहै दस दिसा, सीस पुनि डोलिहै,  
कोऽपि रघुनाथु जब बान तानी ॥

५३

बालिहूँ गर्बु जिय माहिँ ऐसो कियो,  
मारि दहपट दियो जमकी घानी।  
कहति मंदोदरी, सुनहि रावन! मतो,  
बैगि लै देहि बैदेहि रानी ॥

गहनु उज्जारि, पुरु जारि, सुतु मारि तव,  
कुसल गो कीसु बर बैरि जाको।  
दूसरो दूतू पनु रोऽपि कोपेउ सभाँ,  
खर्ब कियो सर्वको, गर्बु थाको ॥

दासु तुलसी सभय बदत मयनंदिनी,  
मंदमति कंत, सुनु मंतु म्हाको।  
तौलौ मिलु बेगि, नहि जौलौं रन रोष भयो  
दासरथि बीर विरुदैत बाँको ॥

काननु उजारि, अच्छु मारि, धारि धूरि कीन्हीं,  
नगरु प्रचारु यो, सो बिलोक्यो बलु कीसको।  
तुम्हैं बिद्यमान जातुधानमंडलीमें कपि  
कोऽपि रोप्यो पाउ, सो प्रभाउ तुलसीसको ॥

कंत ! सुनु मंतु कुल-अंतु किएँ अंत हानि,  
हातो कीजै हीयतें भरोसो भुज बीसको।

५४

तौलौं मिलु बेगि जौलौं चापु न चढायो राम,  
रोषि बानु काढ्यो न दलैया दससीसको ॥  
पवनको पूतु देख्यो दूतु बीर बाँकुरो, जो  
बंक गढ लंक-सो ढकाँ ढकेलि ढाहिगो।  
बालि बलसालिको सो काल्हि दापु दलि कोपि,  
रोप्यो पाउ चपरि, चमुको चाउ चाहिगो ॥  
सोई रघुनाथ कपि साथ पाथनाथु बाँधि,  
आयो नाथ! भागे तें खिरिरि खेह खाहिगो।  
'तुलसी' गरबु तजि मिलिवेको साजु सजि,  
देहि सिय, न तौ पिय! पाइमाल जाहिगो ॥

उदधि अपार उतरत नहिं लागी बार  
केसरीकुमारु सो अदंड-कैसो डाँडिगो  
बाटिका उजारि, अच्छु, रच्छकनि मारि भट  
भारी भारी राउरेके चाउर-से काँडिगो ॥

५५

'तुलसी' तिहारें बिद्यमान जुबराज आजु  
कोऽपि पाउ रोपि, सब छूछे कै कै छाँडिगो।  
कहेकी न लाज, पिय! आजहूँ न पिय आए बाज,  
सहित समाज गहु राँड-कैसो भाँडिगो ॥  
जाके रोष-दुसह-त्रिदोष-दाह दूरि कीन्हे,  
पैअत न छत्री-खोज खोजत खलकमें।  
माहिषमतीको नाथ !साहसी सहस बाहु ॥  
समर-समर्थ नाथ! हेरिए हलकमें ॥  
सहित समाज महाराज सो जहाजराजु  
बूडि गयो जाके बल-बारिधि-छलकमें।

टूटत पिनाककें मनाक बाम रामसे, ते  
नाक बिनु भए भृगुनायकु पलकमें ॥

५६

कीन्ही छोनी छत्री बिनु छोनिप-छपनिहार,  
कठिन कुठार पानि बीर-वानि जानि कै।  
परम कृपाल जो नृपाल लोकपालन पै,  
जब धनुहाई हैहै मन अनुमानि कै ॥

नाकमें पिनाक मिस बामता बिलोकि राम  
रोक्यो परलोक लोक भारी भ्रम भानि कै।  
नाइ दस माथ महि, जोरि बीस हाथ, पिय !  
मिलिए पै नाथ ! रघुनाथ पहिचानि कै ॥

कह्यो मतु मातुल, बिभीषनहूँ बार-बार,  
आँचरु पसार पिय ! पाँय लै-लै हौं परी।

बिदित बिदेहपुर नाथ! भृगुनाथगति,  
समय सयानी कीन्ही जैसी आइ गौं परी।  
बायस, विराध, खर, दूषन, कबंध, बालि,  
बैर रघुबीरकें न पूरी काहूकी परी।  
कंत बीस लोयन बिलोकिए कुमंतफलु,  
ख्याल लंका लाई कपि राँडकी-सी झोपरी ॥

५७

राम सों सामु किऐँ नितु है हितु, कोमल काज न कीजिए टाँठे।  
आपनि सूझि कहौं, पिय ! बूझिए, झूझिबे जोगु न ठाहरु, नाठे ॥  
नाथ! सुनी भृगुनाथकथा, बलि बालि गए चलि बातके साँठे।  
भाइ बिभीषनु जाइ मिल्यो, प्रभु आइ परे सुनि सायर काँठे ॥  
पालिबेको कपि-भालु-चमू जम काल करालहुको पहरी है।  
लंक-से बंक महा गढ दुर्गम द्वाहिबे-दाहिबेको कहरी है ॥  
तीतर-तोम तमीचर-सेन समीरको सूनु बडो बहरी है।  
नाथ! भलो रघुनाथ मिलेँ रजनीचर-सेन हिऐँ हहरी है ॥

५८

राक्षस-वानर-संग्राम

रोष्यो रन रावनु, बोलाए बीर बानइत,  
जानत जे रीति सब संजुग समाजकी।  
चली चतुरंग चमू चपरि हने निसान,  
सेना सराहन जोग रातिचरराजकी ॥

तुलसी बिलोकि कपि-भालु किलकत  
ललकत लखि ज्यों कँगाल पातरी सुनाजकी।  
रामरूख निरखि हरष्यो हियँ हनूमानु,  
मानो खेलवार खोली सीसताज बाजकी ॥

साजि कै सनाह-गजगाह सउछाह दल,  
महाबली धाए बीर जातुधान धीरके।  
इहाँ भालु-बंदर बिसाल मेरु-मंदर-से।  
लिए सैल-साल तोरि नीरनिधितीरके ॥

तुलसी तमकि-ताकि भिरे भारी जुध्द कुध्द,  
सेनप सराहे निज निज भट भीरके।  
रुंडनके झुंड झूमि-झूमि झुकरे-से नाचैं,  
समर सुमार सूर मारैं रघुबीरके ॥

५९

तीखे तुरंग कुरंग सुरंगनि साजि चढे छँटि छैल छबीले।  
भारी गुमान जिन्हें मनमें, कबहूँ न भए रनमें तन ढीले ॥  
तुलसी लखी कै गज केहरि ज्यों झपटे,पटके सब सूर सलीले।  
भूमि परे भट भूमि कराहत, हाँकि हने हनुमान हठीले।  
सूर सँजोइल साजि सुबाजि, सुसेल धरैं बगमेल चले हैं  
भारी भुजा भरी, भारी सरीर, बली बिजयी सब भाँति भले हैं ॥  
'तुलसी' जिन्ह धाएँ धुकै धरनी, धरनीधर धौर धकान हले हैं।  
ते रन-तीक्खन लक्खन लाखन दानि ज्यों दारिद दाबि दले हैं ॥  
गहि मंदर बंदर-भालु चले, सो मनो उनये घन सावनके।

'तुलसी' उत झुंड प्रचंड झुके, झपटैं भट जे सुरदावनके ॥  
बिरुझे बिरुदैत जे खेत अरे, न टरे हठि बैरु बढावनके।  
रन मारि मची उपरी-उपरा भलें बीर रघुप्पति रावनके ॥

६०

सर-तोमर सेलसमूह पँवारत, मारत बीर निसाचरके।  
इत तें तरु-ताल तमाल चले, खर खंड प्रचंड महीधरके ॥  
'तुलसी' करि केहरिनादु भिरे भट, खग्ग खगे, खपुआ खरके।  
नख-दंतन सों भुजदंड विहंडत, मुंडसों मुंड परे झरकैं ॥  
रजनीचर-मत्तगयंद-घटा बिघटै मृगराजके साज लरै।  
झपटै भट कोटि महीं पटकै, गरजै, रघुबीरकी सौंह करै  
तुलसी उत हाँक दसाननु देत, अचेत भे बीर, को धीर धरै।  
बिरुझो रन मारुतको बिरुदैत, जो कालहु कालसो बूझि परै ॥  
जे रजनीचर बीर विसाल, कराल बिलोकत काल न खाए।  
ते रन-रोर कपीसकिसोर बडे बरजोर परे फग पाये ॥  
लूम लपेटि, अकास निहारि कै, हाँकि हठी हनुमान चलाए  
सूखि गो गात, चले नभ जात, परे भ्रमबात, न भूतल आए ॥

६१

जो दससीसु महीधर ईसको बीस भुजा खुलि खेलनिहारो।  
लोकप, दिग्गज, दानव ,देव सबै सहमे सुनि साहसु भारो ॥  
बीर बडो बिरुदैत बली, अजहूँ जग जागत जासु पँवारो।  
सो हनुमान हन्यो मुठिकाँ गिरि गो गिरिराजु ज्यों गाजको मारो ॥  
दुर्गम दुर्ग, पहारतें भारे, प्रचंड महा भुजदंड बने हैं ।  
लक्खमें पक्खर, तिक्खन तेज, जे सूरसमाजमें गाज गने हैं ॥  
ते बिरुदैत बली रनबाँकुरे हाँकि हठी हनुमान हने हैं।  
नामु लै रामु देखावत बंधुको घूमत घायल घायँ घने हैं ॥  
हाथिन सों हाथी मारे, घोरेसों सँघारे घोरे,  
रथनि सों रथ बिदरनि बलवानकी।

६२

चंचल चपेट, चोट चरन चकोट चाहें,  
हहरानी फौजें भहरानी जातुधानकी ॥

बार-बार सेवक-सराहना करत रामु,  
'तुलसी' सराहै रीति साहेब सुजानकी ।  
लाँबी लूम लसत, लपेटि पटकत भट,  
देखौ देखौ, लखन ! लरनि हनुमानकी ॥

दबकि दबोरे एक, बारिधिमें बोरे एक,  
मगन महीमें, एक गगन उड्डात हैं ।  
पकरि पछारे कर, चरन उखारे एक,  
चीरी-फारि डारे, एक मीजि मारे लात हैं ॥

'तुलसी' लखत, रामु, रावनु, बिबुध, बिधि,  
चक्रपानि, चंडीपति, चंडिका सिहात हैं ॥

बड़े-बड़े बानइत बीर बलवान बड़े,  
जातुधान, जूथप निपाते बातजात हैं ॥

६३

प्रबल प्रचंड बरिबंड बाहुदंड बीर  
धाए जातुधान, हनुमानु लियो घेरि कै ।  
महाबलपुंज कुंजरारि ज्यों गरजि, भट  
जहाँ-तहाँ पटके लँगूर फेरि-फेरि कै ।  
मारे लात, तोरे गात, भागे जात हाहा खात,  
कहैं, 'तुलसीस! राखि रामकी सौं टरि कै ।  
ठहर-ठहर परे, कहरि-कहरि उठैं,  
हहरि-हहरि हरु सिध्द हँसे हेरि कै ॥

जाकी बाँकी बीरता सुनत सहमत सूर,  
जाकी आँच अबहूँ लसत लंक लाह-सी ।  
सोई हनुमान बलवान बाँको बानइत,  
जोहि जातुधान-सेना चल्यो लेत थाह-सी ॥

कंपत अकंपन, सुखाय अतिकाय काय,

कुंभऊकरन आइ रह्यो पाइ आह-सी।  
देखे गजराज मृगराजु ज्यों गरजि धायो,  
बीर रघुबीरको समीरसूनु साहसी ॥

६४

झूलना

मत्त-भट-मुकुट, दसकंठ-साहस-सइल-  
सुंग-बिद्वरनि जनु बज्र-टाँकी।  
दसन धरि धरनि चिक्करत दिग्गज, कमठु,  
सेषु संकुचित, संकित पिनाकी ॥  
चलत महि-मेरु, उच्छलत सायर सकल,  
बिकल बिधि बधिर दिसि-बिदसि झाँकी।  
रजनिचर-घरनि घर गर्भ-अर्भक स्रवत,  
सुनत हनुमानकी हाँक बाँकी ॥  
कौनकी हाँकपर चौंक चंडीसु, बिधि,  
चंडकर थकित फिरि तुरग हाँके।  
कौनके तेज बलसीम भट भीम-से  
भीमता निरखि कर नयन ढाँके ॥  
दास-तुलसीसके बिरुद बरनत बिदुष,  
बीर बिरुदैत बर बैरि धाँके।  
नाक नरलोक पाताल कोउ कहत किन  
कहाँ हनुमानु-से बीर बाँके।

६५

जातुधानावली-मत्तकुंजरघटा  
निरखि मतगराजु ज्यों गिरितें टूट्यो।  
बिकट चटकन चोट, चरन गहि, पटक महि,  
निघटि गए सुभट, सतु सबको छूट्यो ॥  
'दासु तुलसी' परत धरनि धरकत, झुकत  
हाट-सी उठति जंबुकनि लूट्यो।

धीर रघूबीरको भीर रनबाँकुरो  
हाँकि हनुमान कुलि कटकु कूट्यो ॥

छप्पै

कतहुँ बिटप-भूधर उपारि परसेन बरष्वत ।  
कतहुँ बाजिसों बाजि मर्दि, गजराज करष्वत ॥  
चरनचोट चटकन चकोट अरि-उर-सिर बज्जत ।  
बिकट कटकु बिद्वरत वीरु बारिदु जिमि गज्जत ॥  
लंगूर लपेटत पटक भट, जयति राम, जय! उच्चरत ।  
तुलसीस पवननंदनु अटल जुध्द क्रुध्द कौतुक करत ॥

६६

अंग-अंग दलित ललित फूले किसुक-से  
हने भट लाखन लखन जातुधानके ।  
मारि कै, पछारि कै, उपारि भुजदंड चंड,  
खंडि-खंडि डारे ते बिदारे हनुमानके ॥

कूदत कबंधके कदम्ब बंब-सी करत,  
धावत दिखावत हैं लाघौ राघौबानके ।  
तुलसी महेसु, बिधि, लोकपाल, देवगन,  
देखत बेवान चढे कौतुक मसानके ॥

लोथिन सों लोहूके प्रबाह चले जहाँ-तहाँ  
मानहुँ गिरिन्ह गेरु झरना झरत हैं ।  
श्रोनितसरित घौर कुंजर-करारे भारे,

कूलतें समूल बाजि-बिटप परत हैं ॥

सुभट-सरीर नीर-चारी भारी-भारी तहाँ,  
सूरनि उछाहु, कूर कादर डरत हैं ।  
फेकरि- फेकरि फेरु फारि- फारि पेट खात,  
काक-कंक बालक कोलाहलु करत हैं ॥

६७

ओझरीकी झोरी काँधे, आँतनिकी सेल्ही बाँधें,

मूँडके कमंडल खपर किएँ कोरि कै।  
 जोगिनी झुंठुंग झुंड-झुंड बनीं तापसीं-सी  
 तीर-तीर बैठीं सो समर-सरि खौरि कै ॥  
 श्रोनित सों सानि -सानि गूदा खात सतुआ-से  
 प्रेत एक पिअत बहोरि घोरि-घोरि कै।  
 'तुलसि' बैताल-भूत साथ लिए भूतनाथु,  
 हेरि- हेरि हँसत हैं हाथ-हाथ जोरि कै ॥  
 राम सरासन तें चले तीर रहे न सरीर, हडावरि फूटीं।  
 रावन धीर न पीर गनी, लखि लै कर खप्पर जोगिनि जूटीं ॥  
 श्रोनित -छीट छटानि जटे तुलसी प्रभु सोहैं महा छवि छूटीं।  
 मानो मरकत-सैल बिसालमें फैलि चलीं बर बीरबहूटीं

६८

लक्ष्मणमूर्छा

मानी मैगनादसों प्रचारि भिरे भारी भट,  
 आपने अपन पुरुषारथ न ढील की।  
 घायल लखनलालु लखी बिलखाने रामु,  
 भई आस सिथिल जगन्निवास-दीलकी ॥  
 भाईको न मोहु छोहु सीयको न तुलसीस  
 कहैं 'मैं विभीषनकी कछु न सबील की'  
 लाज बाँह बोलेकी, नेवाजकी सँभार-सार  
 साहेबु न रामु-से बलाइ लेउँ सीलकी ॥  
 कानन बासु दसानन सो रिपु  
 आननश्री ससि जीति लियो है।  
 बालि महा बलसालि दल्यो  
 कपि पालि विभीषनु भूपु कियो हैं ॥  
 तीय हरी, रन बंधु पर्यो  
 पै भर् यो सरनागत सोच हियो है।  
 बाँह-पगार उदार कृपाल  
 कहाँ रघुवीरु सो बीरु बियो है ॥

६९

लीन्हो उखारि पहारु बिसाल,  
चल्यो तेहि काल, बिलंबु न लायो।  
मारुतनंदन मारुतको, मनको,  
खगराजको बेगु लजायो ॥

तीखी तुरा 'तुलसी' कहतो  
पै हिउँ उपमाको समाउ न आयो।  
मानो प्रतच्छ परब्वतकी नभ।  
लीक लसी, कपि यों धुकि धायो ॥

चल्यो हनुमानु, सुनि जातुधान कालनेमि  
पठयो, सो मुनि भयो, पायो फलु छलि कै।  
सहसा उखारो है पहारु बहु जोजनको,  
रखवारे मारे भारे भूरि भट दलि कै ॥

७०

बेगु, बलु, साहस, सराहत कृपालु रामु,  
भरतकी कुसल, अचलु ल्यायो चलि कै।  
हाथ हरिनाथके बिकाने रघुनाथ जनु,  
सीलसिंधु तुलसीस भलो मान्यो भलि कै ॥

युध्दका अंत

बाप दियो काननु, भो आननु सुभाननु सो,  
बैरी भौ दसाननु सो, तीयको हरनु भो  
बालि बलसालि दलि, पालि कपिराजको,  
विभीषनु नेवाजि, सेत सागर-तरनु भो ॥

घोर रारि हेरि त्रिपुरारि-बिधि हारे हिउँ,  
घायल लखन बीर नर बरनु भो।  
ऐसे सोकमें तिलोकु कै बिसोक पलही में,  
सबही को तुलसीको साहेबु सरनु भो ॥

७१

कुंभकरनु हन्यो रन राम, दल्यो दसकंधरु कंधर तोरे।

पूषनवंस विभूषन-पूषन-तेज-प्रताप गरे अरि-ओरे ॥

देव निसान बजावत, गावत, साँवतु गो मनभावत भो रे।  
नाचत-बानर-भालु सबै 'तुलसी' कहि 'हा रे! हहा भै अहो रे ॥

मारे रन रातिचर रावनु सकुल दलि,  
अनुकूल देव-मुनि फूल बरषतु है।  
नाग, नर, किंनर, बिरंचि, हरि, हरु हेरि  
पुलक सरीर हिउँ हेतु हरषत हैं ॥

बाम ओर जानकी कृपानिधानके बिराजैं,  
देखत बिषादु मिटै, मोदु करषतु हैं।  
आयसु भो ,लोकनि सिधारे लोकपाल सबै,  
'तुलसी' निहाल कै कै दिये सरखतु हैं ॥

(इति लंकाकाण्ड)

७२

उत्तरकाण्ड

रामकी कृपालुता

बालि-सो बीरु विदारि सुकंठु, थप्यो, हरषे सुर बाजने बाजे।  
पलमें दल्यो दासरथीं दसकंधरु, लंक बिभीषनु राज बिराजे ॥  
राम सुभाउ सुनें 'तुलसी' हिलसै अलसी हम-से गलगाजे।  
कायर कूर कपूतनकी हद, तेउ गरीबनेवाज नेवाजे ॥  
बेद पढ़ै विधि, संभुसभीत पुजावन रावनसों नितु आवैं।  
दानव देव दयावने दीन दुखी दिन दूरहि तें सिरु नावैं ॥  
ऐसेउ भाग भगे दसभाल तें जो प्रभुता कवि-कोविद गावैं।  
रामसे बाम भएँ तेहि बामहि बाम सबै सुख संपति लावैं ॥  
बेद बिरुध्द मही, मुनि साधु ससोक किए सुरलोकु उजारो।  
और कहा कहौ, तीय हरी, तबहूँ करुनाकर कोपु न धारौ ॥  
सेवक-छोह तें छाडी छमा, तुलसी लख्यो राम !सुभाउ तिहारो।

तौलों न दापु दल्यौ दसकंधर, जौलौ बिभीषन लातु न मारो ॥

७३

सोक समुद्र निमज्जत काढि कपीसु कियो, जगु जानत जैसो ।  
नीच निसाचर बैरिको बंधु बिभीषनु कीन्ह पुरंदर कैसो ॥

नाम लिउँ अपनाइ लियो तुलसी-सो, कहौं जग कौन अनैसो ।  
आरत आरति भंजन रामु, गरीबनेवाज न दूसरो ऐसो ॥

मीत पुनीत कियो कपि भालुको, पाल्यो ज्यों काहुँ न बाल तनुजो ।  
सज्जन सीव बिभीषनु भो, अजहूँ बिलसै बर बंधुबधू जो ॥

कोसलपाल बिना 'तुलसी' सरनागतपाल कृपाल न दूजो ।  
कूर, कुजाति, कुपूत, अघी, सबकी सुधरै, जो करै नरु पूजो ॥

तीय सिरोमनि सीय तजी, जेहि पावककी कलुषाई दही है ॥

धर्मधुरंधर बंधु तज्यो, पुरलोगनिकी बिधि बोलि कही है ॥

कीस निसाचरकी करनी न सुनी, न बिलोकी, न चित्त रही है ।  
राम सदा सरनागतकी अनखौंहीं, अनैसी सुभायँ सही है ॥

७४

अपराध अगाध भएँ जनतें, अपने उर आनत नाहिन जू ।  
गनिका, गज, गीध, अजामिलके गनि पातकपुंज सिराहिं न जू ॥

लिउँ बारक नामु सुधामु दियो, जेहिं धाम महामुनि जाहिं न जू  
तुलसी! भजु दीनदयालहि रे ! रघुनाथ अनाथहि दाहिन जू ॥

प्रभु सत्य करी प्रह्लादगिरा, प्रगटे नरकेहरि खंभ महाँ ।  
झषराज ग्रस्यो गजराजु, कृपा ततकाल बिलंबु कियो न तहाँ ॥

सुर साखि दै राखी है पांडुबधू पट लूटत, कोटिक भूप जहाँ ।  
तुलसी ! भजु सोच-बिमोचनको, जनको पनु राम न राख्यो कहाँ ॥

७५

नरनारि उघारि सभा महुँ होत दियो पटु, सोचु हर्यो मनको ।  
प्रह्लाद बिषाद-निवारन, बारन-तारन, मीत अकारनको ॥

जो कहावत दीनदयाल सही, जेहि भारु सदा अपने पनको ।

'तुलसी' तजि आन भरोस भजें , भगवानु भलो करिहैं जनको ॥  
 रिषिनारि उधारि, कियो सठ केवटु मीतु पुनीत, सुकीर्ति लही।  
 निजलोकु दयो सबरी-खगको, कपि थाप्यो, सो मालुम है सबही ॥  
 दससीस-बिरोध समीत बिभीषनु भूपु कियो, जग लीक रही।  
 करुनानिधिको भजु, रे तुलसी! रघुनाथ अनाथके नाथु सही ॥  
 कौसिक, बिप्रबधू मिथिलाधिपके सब सोच दले पल माहैं।  
 बालि-दसानन-बंधु-कथा सुनि, सत्रु सुसाहेब-सीलु सराहैं ॥  
 ऐसी अनूप कहैं तुलसी रघुनायककी अगनी गुनगाहैं।  
 आरत, दीन, अनाथनको रघुनाथु करैं निज हाथकी छाहैं ॥

७६

तेरे बेसाहैं बेसाहत औरनि, और बेसाहिकै बेचनिहारे।  
 व्योम, रसातल, भूमि भरे नृप कूर, कुसाहेब सेंतिहुँ खारे ॥  
 'तुलसी' तेहि सेवत कौन मरै ! रजतें लघुको करैं मेरुतें भारे?  
 स्वामि सुसील समर्थ सुजान, सो तो-हो तुहीं दसरत्थ दुलारे  
 जातुधान, भालु, कपि, केवट, विहंग जो-जो  
 पाल्यो नाथ! सद्य सो. सो भयो काम-काजको।  
 आरत अनाथ दीन मलिन सरन आए,  
 राखे अपनाइ, सो सुभाउ महाराजको ॥  
 नामु तुलसी, पै भोंडो भाँग तें , कहायो दासु,  
 कियो अंगीकार ऐसे बडे दगाबाजको।  
 साहेबु समर्थ दसरत्थके दयालदेव !  
 दूसरो न तो-सो तुम्हीं आपनेकी लाजको ॥  
 महबली बालि दलि, कायर सुकंठु कपि  
 सखा किए महाराज! हो न काहू कामको।  
 भ्रात-घात-पातकी निसाचर सरन आएँ,  
 कियो अंगीकार नाथ एते बडे बामको ॥

७७

राय, दसरत्थके ! समर्थ तेरे नाम लिएँ,

तुलसी-से कूरको कहत जगु रामको ।  
 आपने निवाजेकी तौ लाज महाराजको  
 सुभाउ, समुझत मनु मुदित गुलामको ॥

रूप-सीलसिंधु, गुनसिंधु, बंधु दीनको,  
 दयानिधान, जानमनि, बीरबाहु-बोलको ।  
 स्वाध्द कियो गीधको, सराहे फल सबरीके  
 सिला-साप-समन, निबाह्यो नेहु कोलको ॥

तुलसी-उराउ होत रामको सुभाउ सुनि,  
 को न बलि जाइ, न बिकाइ बिनु मोल को ।  
 ऐसेहु सुसाहेबसों जाको अनुरागु न, सो  
 बडोई अभागो, भागु भागो लोभ -लोलको ॥

सूरसिरताज, महाराजनि के महाराज  
 जाको नामु लेतहीं सुखेतु होत ऊसरो ।  
 साहेबु कहाँ जहान जानकीसु सो सुजानु,  
 सुमिरें कृपालुके मरालु होत खूसरो ॥

७८

केवट, पषान, जातुधान, कपि-भालु तारे,  
 अपनायो तुलसी-सो धींग धमधूसरो ।  
 बोलको अटल, बाँहको पगारु, दीनबंधु,  
 दूबरेको दानी, को दयानिधान दूसरो ॥

कीबेको बिसोक लोक लोकपाल हुते सब,  
 कहुँ कोऊ भो न चरवाहो कपि -भालुको ।  
 पबिको पहारु कियो ख्यालही कृपाल राम,  
 बापुरो बिभीषनु घरौंघा हुतो बालको ॥

नाम-ओट लेत ही निखोट होत खोटे खल,  
 चोट बिनु मोट पाइ भयो न निहालु को ?  
 तुलसीकी बार बडी ढील होति सीलसिंधु !  
 बिगरी सुधारिवेको दूसरो दयालु को ॥

नामु लिउँ पूतको पुनीत कियो पातकीसु,  
 आरति निवारी 'प्रभु पाहि' कहें पीलकी ।

७९

छलनिको छोड़ी, सो निगोड़ी छोटी जाति -पाँति  
कीन्ही लीन आपुमें सुनारी भोंडे भीलकी ॥

तुलसी औ तोरिबो विसारबो न अंत मोहि,  
नीकें है प्रतीति रावरे सुभाव-सीलकी।  
देऊ, तो दयानिकेत, देत दादि दीननको,  
मेरी बार मेरें ही अभाग नाथ ढील की ॥

आगें परे पाहन कृपाँ किरात, कोलनी,  
कपीस, निसिचर अपनाए नाएँ माथ जू।  
साँची सेवकाई हनुमान की सुजानराय,  
रिनियाँ कहाए हौ, बिकाने ताके हाथ जू ॥

तुलसी-से खोटे खरे होत ओट नाम ही की ,  
तेजी माटी मगहू की मृगमद साथ जू।  
बात चलें बातको न मानिबो बिलगु, बलि,  
काकीं सेवाँ रीझिके नेवाजो रघुनाथ जू?

८०

कौसिककी चलत, पषानकी परस पाय,  
टूटत धनुष बनि गई है जनककी।  
कोल, पसु, सबरी, बिहंग, भालु, रातिचर,  
रतिनके लालचचिन प्रापति मनककी ॥

कोटि-कला-कुसल कृपाल नतपाल ! बलि,  
बातहू केतिक तिन तुलसी तनककी।  
राय दसरत्थ के समत्थ राम राजमनि !  
तेरें हेरें लोपै लिपि विधिहू गनककी ॥

सिला-श्राप पापु गुह-गीधको मिलापु  
सबरीके पास आपु चलि गए हौ सो सुनी मैं।  
सेवक सराहे कपिनायकु बिभीषनु  
भरतसभा सादर सनेह सुरधुनी मैं ॥

आलसी- अभागी-अधी-आरत -अनाथपाल  
 साहेबु समर्थ एक, नीकें मन गुनी मैं।  
 दोष-दुख-दारिद्र-दलैया दीनबंधु राम !  
 'तुलसी' न दूसरो दयानिधानु दुनी मैं ॥

८१

मीतु बालिबंधु, पूत, दूत, दसकंधबंधु  
 सचिव, सराधु कियो सबरी-जटाइको।  
 लंक जरी जोहें जियँ सोचसो विभीषनुको,  
 कहौ ऐसे साहेबकी सेवाँ न खटाइ को ॥  
 बडे एक-एकतें अनेक लोक लोकपाल,  
 अपने-अपनेको तौ कहैगो घटाइ को।  
 साँकरेके सेइबे, सराहिबे, सुमिरिबेको  
 रामु सो न साहेबु न कुमति-कटाइ को ॥  
 भूमिपाल, ब्यालपाल, नाकपाल, लोकपाल  
 कारन कृपाल, मैं सबैके जीकी थाह ली।  
 कादरको आदरु काहूकें नाहिं देखिअत,  
 सबनि सोहात है सेवा-सुजानि टाहली ॥  
 तुलसी सुभायँ कहै, नाहीं कछु पच्छपातु,  
 कौनेँ ईस किए कीस भालु खास माहली।  
 रामही के द्वारे पै बोलाइ सनमानिअत  
 मोसे दीन दूबरे कपूत कूर काहली ॥

८२

सेवा अनुरूप फल देत भूप कूप ज्यों,  
 बिहूने गुन पथिक पिआसे जात पथके।  
 लेखें-जोखैं चित'तुलसी' स्वारथ हित,  
 नीकें देखे देवता देवैया घने गथके ॥  
 गीधु मानो गुरु कपि-भालु माने मीत कै,  
 पूनीत गीत साके सब साहेब समत्थके।  
 और भूप परखि सुलाखि तौलि ताइ लेत,

लसमके खसमु तुरीं पै दसरत्थके ॥

केवल रामहीसे माँगो

रीति महाराजकी, नेवाजिए जो माँगनो, सो  
दोष-दुख-दारिद दरिद्र कै-कै छोडिए।

८३

नामु जाको कामतरु देत फल चारि, ताहि  
'तुलसी' बिहाइके बबूर-रेंड गोडिए ॥

जाचे को नरेस, देस-देसको कलेसु करै  
देहैं तौ प्रसन्न है बडी बडाई बौडिए।

कृपा-पाथनाथ लोकनाथ-नाथ सीतानाथ  
तजि रघुनाथ हाथ और काहि औडिये ॥

जाकें बिलोकत लोकप होत, बिसोक लहैं सुरलोग सुठौरहि।  
सो कमला तजि चंचलता, करि कोटि कला रिझवै सुरमौरहि ॥

ताको कहाइ, कहै तुलसी, तूँ लजाहि न मागत कूकुर-कौरहि।  
जानकी-जीवनको जनु है जरि जाउ सो जीह जो जाचत औरहि ॥

जड पंच मिलै जेहिं देह करी, करनी लखु धौं धरनीधरकी।  
जनकी कहु, क्यों करिहैं न सँभार, जो सार करै सचराचरकी ॥

तुलसी! कहु राम समान को आन है, सेवकि जासु रमा घरकी।  
जगमें गति जाहि जगत्पतिकी परवाह है ताहि कहा नरकी ॥

८४

जग जाचिअ कोउ न, जाचिअ जौं जियँ जाचा जानकीजानहि रे।  
जेहि जाचत जाचकता जरि जाइ, जो जारति जोर जहानहि रे ॥

गति देखु बिचारि बिभीषनकी, अरु आनु हिए हनुमानहि रे।  
तुलसी ! भजु दारिद-दोष-दवानल संकट-कोटि कृपानहि रे ॥

उद्धोधन

सुनु कान दिउँ, नितु नेमु लिउँ रघुनाथहिके गुनगाथहि रे।  
सुखमंदिर सुंदर रुपु सदा उर आनि धरें धनु-भाथहि रे ॥

रसना निसि-बासर सादर सों तुलसी ! जपु जानकीनाथहि रे।  
करु संग सुसील सुसंतन सों, तजि कूर, कुफंथ कुसाथहि रे॥  
सुत, दार, अगारु, सखा, परिवारु बिलोकु महा कुसमाजहि रे।  
सबकी ममता तजि कै, समता सजि, संतसभाँ न बिराजहि रे॥  
नरदेह कहा, करि देखु विचारु, बिगारु गँवार न काजहि रे।  
जनि डोलहि लोलुप कूकरु ज्यों, तुलसी भजु कोसलराजहि रे॥

८५

बिषया परनारि निसा-तरुनाई सो पाइ पर यो अनुरागहि रे।  
जमके पहरु दुख, रोग बियोग बिलोकत हू न बिरागहि रे॥  
ममता बस तैं सब भूलि गयो, भयो भोरु महा भय भागहि रे।  
जरठाइ दिसाँ ,रबिकालु अग्यो, अजहूँ जड जीव ! न जागहि रे॥  
जनम्यो जेहिं जोनि, अनेक क्रिया सुख लागि करीं, न परैं बरनी।  
जननी-जनकादि हितु भये भूरि बहोरि भई उरकी जरनी॥  
तुलसी ! अब रामको दासु कहाइ, हिउँ धरु चातककी धरनी।  
करि हंसको बेषु बडो सबसों, तजि दे बक-बायसकी करनी॥  
भलि भारतभूमि, भलें कुल जन्मु, समाजु सरीरु भलो लहि कै।  
करषा तजि कै परुषा बरषा हिम, मारुत, घाम सदा सहि कै॥  
जो भजै भगवानु सयान सोई, 'तुलसी' हठ चातकु ज्यों गहि कै॥  
नतु और सबै बिषबीज बए, हर हाटक कामदुहा नहि कै॥

८६

जो सुकृती सुचिमत सुसंत सुजान सुसीलसिरोमनि स्वै।  
सुर-तीरथ तासु मनावत आवत ,पावन होत हैं ता तनु छवै॥  
गुनगेह सनेहको भाजनु सो, सब ही सों उठाइ कहौं भुज द्वै।  
सतिभायँ सदा छल छाडि सबैतुलसी जो रहै रघुबीरको है॥

विनय

सो जननी,सो पिता, सोइ भाइ, सोभामिनि,सो सुतु,सो हित मेरो।  
सोइ सगो, सो सखा,सोइ सेवकु, सो गुरु, सो सुरु,साहेबु चरो॥

सो 'तुलसी' प्रिय प्रान समान, कहाँ लौं बनाइ कहौं बहुतेरो ।  
जो तजि देहको, गेहको नेहु, सनेहसो रामको होइ सबेरो ॥  
रामु हैं मातु, पिता, गुरु, बंधु, औ संगी,सखा,सुतु, स्वामि, सनेही।  
रामकी सौंह, भरोसो है रामको, राम रँग्यो, रुचि राच्यो न केही ॥  
जीअत रामु, मुएँ पुनि रामु, सदा रघुनाथहि की गति जेही।  
सोई जिए जगमें, 'तुलसी' नतु डोलत और मुए धरि देही ॥

८७

रामप्रेम ही सार है

सियराम-सरुपु अगाध अनूप बिलोचन-मीनको जलु है।  
श्रुति रामकथा, मुख रामको नामु, हिएँ पुनि रामहिको थलु है  
मति रामहि सों, गति रामहि सों, रति रामसों, रामहि को बलु है।  
सबकी न कहै, तुलसीके मतेँ इतनो जग जीवनको फलु है ॥  
दसरत्थके दानि सिरोमनि राम! पुरान प्रसिध्द सुन्यो जसु मै।  
नर नाग सुरासर जाचक जो, तुमसों मन भावत पायो न कै ॥  
तुलसी कर जोरि करै बिनती, जो कृपा करि दीनदयाल सुनै  
जेहि देह सनेहु न रावरे सों,असि देह धराइ कै जायँ जियै ॥  
झूठो है, झूठो है,झूठो सदा जगु, संत कहंत जे अंतु लहा है ॥  
ताको सहै सठ ! संकट कोटिक, काढत दंत, करंत हहा है ॥  
जानपनीको गुमान बढो, तुलसीके बिचार गँवार महा है।  
जानकीजीवनु जान न जान्यो तौ जान कहावत जान्यो कहा है ॥

८८

तिन्ह तें खर, सूकर, स्वान भले, जडता बस ते न कहैं कछु वै।  
'तुलसी' जेहि रामसों नेहु नहीं सो सही पसु पूँछ, बिषान न द्वै ।  
जननी कत भार मुई दस मास, भई किन बाँझ,गई किन चै।  
जरि जाउ सो जीवनु,जानकीनाथ ! जियै जगमें तुम्हरौ विनु है ॥  
गज-बाजि-घटा, भले भूरि भटा, बनिता, सुत भौंह तकैं सब वै।  
धरनी,धनु धाम सरीरु भलो, सुरलोकहु चाहि इहै सुख स्वै।  
सब फोटक साटक है तुलसी,अपनो न कछू सपनो दिन द्वै।

जरि जाउ सो जीवन जानकीनाथ! जियै जगमें तुम्हरो बिनु है ॥  
सुरराज सो राज-समाजु, समृद्धि बिरंचि, धनाधिप-सो धनु भौ ॥  
पवमानु-सो पावकु-सो, जमु, सोमु-सो, पूषनु-सो भवभूषनु भो ॥  
करि जोग, समीरन साधि, समाधि कै धीर बडो, बसहू मनु भो ॥  
सब जाय, सुभायँ कहै तुलसी, जो नै जानकीजीवनको जनु भो ॥

८९

कामु-से रूप, प्रताप दिनेसु-से, सोमु-से सील, गनेसु-से माने ॥  
हरिचंद्र-से साँचे, बडे विधि-से, मघवा-से महीप विधै-सुख-साने ॥  
सुक-से मुनि, सारद-से बकता, चिरजीवन लोमस तें अधिकाने ॥  
ऐसे भए तौ कहा 'तुलसी,' जो पै राजिवलोचन रामु न जाने ॥  
झूमत द्वार अनेक मतंग जँजीर-जरे, मद अंबु चुचाते ॥  
तीखे तुरंग मनोगति-चंचल, पौनके गौनहु तें बढि जाते ॥  
भीतर चंद्रमुखी अवलोकति, बाहर भूप करे न समाते ॥  
ऐसे भए तौ कहा, तुलसी, जो पै जानकीनाथके रंग न राते ॥  
राज सुरेस पचासकको विधिके करको जो पटो लिखि पाएँ ॥  
पूत सुपूत, पुनीत प्रिया, निज सुंदरताँ रतिको महु नाएँ ॥  
संपति-सिद्धि सबै 'तुलसी' मनकी मनसा चतवैँ चितु लाएँ ॥  
जानकीजीवनु जाने बिना जग ऐसेउ जीव न जीव कहाएँ ॥

९०

कृसगात ललात जो रोटिन को, घरवात घरें खुरपा-खरिया ॥  
तिन्ह सोनेके मेरु-से ढेर लहे, मनु तौ न भरो, घरु पै भरिया ॥  
'तुलसी' दुखु दूनो दसा दुहुँ देखि, कियो मुखु दारिद को करिया ॥  
तजि आस भो दासु रघुप्पतिको, दसरथतको दानि दया-दरिया ॥  
को भरिहे हरिके रितएँ, रितवै पुनि को, हरि जौ भरिहै ॥  
उथपै तेहि को, जेहि रामु थपै, थपिहै तेहि को, हरि जौ टरिहै ॥  
तुलसी यहु जानि हिणँ अपनैँ सपनैँ नहि कालहु तें डरिहै ॥  
कुमयाँ कछु हानि न औरनकीं, जो पै जानकी-नाथु मया करिहै ॥

ब्याल कराल महाविष, पावक मत्तगयंदहु के रद तोरे।  
 साँसति संकि चली, डरपे हुते किंकर, ते करनी मुख मोरे ॥  
 नेकु विषादु नहीं प्रहलादहि कारन केहरिके बल हो रे।  
 कौनकी त्रास करै तुलसी जो पै राखिहै राम, तौ मारिहै को रे।

९१

कृपाँ जिनकीं कछु काजु नहीं, न अकाजु कछू जिनकेँ मुखू मोरे।  
 करैँ तिनकी परवाहि ते, जो बिनु पूँछ-बिषान फिरैँ दिन दौरैँ ॥  
 तुलसी जेहिके रघुनाथसे नाथु, समर्थ सुसेवत रीझत थोरे।  
 कहा भवभीर परी तेहि धौँ बिचरे धरनीं तिनसों तिनु तोरैँ ॥  
 कानन, भूधर, बारि, बयारि, महाविषु, ब्याधि, दवा-अरि घेरे।  
 संकट कोटि जहाँ 'तुलसी' सुत, मातु, पिता, हित, बंधु न नरैँ ॥  
 राखिहैँ रामु कृपालु तहाँ, हनुमानु-से सेवक हैं जेहि केरे।  
 नाक, रसातल, भूतलमें रघुनायकु एकु सहायकु मेरे ॥  
 जबै जमराज-रजायसतें मोहि लै चलिहैँ भट बाँधि नटैया।  
 तातु न मातु, न स्वामि-सखा, सुत-बंधु बिसाल बिपत्ति बँटैया ॥  
 साँसति घोर, पुकारत आरत कौन सुनै, चहुँ ओर डटैया।  
 एकु कृपाल तहाँ 'तुलसी' दसरथको नंदनु बँदि-कटैया ॥

९२

जहाँ जमजातना, घोर नदी, भट कोटि जलचर दंत टैवेया।  
 जहँ धार भयंकर, वारन पार, न बोहित नाव, न नीक खेवैया ॥  
 'तुलसी' जहँ मातु-पिता न सखा, नहिं कोउ कहुँ अवलंब देवैया।  
 तहाँ बुनु कारन रामु कृपाल बिसाल भुजा गहि काटि लेवैया ॥  
 जहाँ हित स्वामि, नसंग सखा, बनिता, सुत, बंधु, न बाप, न मैया।  
 काय-गिरा-मनके जनके अपराध सबै छलु छाडि छमैया ॥  
 तुलसी! तेहि काल कृपाल बिना दूजो कौन है दारुन दुःख दमैया ॥  
 जहाँ सब संकट, दुर्गत सोचु, तहाँ मेरो साहेबु राखै रमैया ॥  
 तापसको बरदायक देव सबै पुनि बैरु बढावत बाढ़ें।

थोरेंहि कोपु, कृपा पुनि थोरेंहि, बैठि कै जोरत, तोरत ठाढ़ें ॥  
 ठोंकि-बजाई लखें गजराज, कहाँ लौं कहौं केहि सों रद काढ़ें ।  
 आरतके हित नाथु अनाथके रामु सहाय सही दिन गाढ़ें ॥

९३

जप, जोग, बिराग, महामख-साधन, दान, दया, दम कोटि करै ।  
 मुनि-सिध्द, सुरेसु, गनेसु, महेसु-से सेवत जन्म अनेक मरै ॥  
 निगमागम-ग्यान, पुरान पढे, तपसानलमें जुगपुंज जरै ।  
 मनसों पनु रोऽपि कहै तुलसी, रघुनाथ बिना दुख कौन हरै ॥  
 पातक-पीन, कुदारद-दीन मलीन धरैं कथरी-करवा है ।  
 लोकु कहै, विधिहूँ न लिख्यो सपनेहूँ नहीं अपने बर बाहै ॥  
 रामको किकरु सो तुलसी, समुझैहि भलो, कहिबो न रवा है ।  
 ऐसेको ऐसो भयो कबहूँ न भजे बिनु बानरके चरवाहै ॥  
 मातु-पिताँ जग जाइ तज्यो विधिहूँ न लिखी कछु भाल भलाई ॥  
 नीच, निरादरभाजन, कादर, कूकर-टूकन लागि ललाई ॥  
 रामु-सुभाउ सुन्यो तुलसीं प्रभुसों कछो बारक पेटु खलाई ।  
 स्वारथको परमारथको रघूनाथु सो साहेबु, खोरि न लाई ॥

९४

पाप हरे, परिताप हरे, तनु पूजि भो हीतल सीतलताई ।  
 हंसु कियो बकतें, बलि जाउँ, कहाँलौं कहौं करुना-अधिकाई ॥  
 कालु बिलोकि कहै तुलसी, मनमें प्रभुकी परतीति अघाई ।  
 जन्मु जहाँ, तहँ रावरे सों निबहै भरि देह सनेह-सगाई ॥  
 लोग कहैं, अरु हौंहु कहौं, जनु खोटो-खरो रघुनायकहीको ।  
 रावरी राम! बडी लघुता, जसु मेरो भयो सुखदायकहीको ॥  
 कै यह हानि सहौ, बलि जाउँ कि मोहू करौ निज लायकहीको ।  
 आनि हिउँ हित जानि करौ, ज्यों हौं ध्यानु धरौं धनु-सायकहीको ॥  
 आपु हौं आपुको नीकें कै जानत, रावरो राम! भरायो-गढायो ।  
 कीरु ज्यों नामु रटै तुलसी, सो कहै जगु जानकीनाथ पढायो ॥

९५

सोई है खेदु, जो बेदु कहै, न घटे जनु जो रघुवीर बढ़ायो।  
हौं तो सदा खरको असवार, तिहारोइ नामु गयंद चढायो ॥

छारतें सँवारि कै पहारहू तें भारी कियो,  
गारो भयो पंचमें पुनीत पच्छु पाइ कै।  
हौं तो जैसो तब तैसो अब अधमाई कै कै,  
पेटु भरौं, राम! रावरोई गुनु गाईके ॥  
आपने निवाजेकी पै कीजै लाज, महाराज!  
मेरी ओर हेरि कै न बैठिए रिसाइ कै।  
पालिकै कृपाल! ब्याल-बालको न मारिये,  
औ काटिए न नाथ ! बिषहूको रुखु लाइ कै ॥

बेद न पुरान-गानु, जानौं न बिग्यानु ग्यानु,  
ध्यान-धारना-समाधि-साधन-प्रवीनता  
नाहिन बिरागु, जोग, जाग भाग तुलसी कै,  
दया-दान दूबरो हौं, पापही की पीनता ॥  
लोभ-मोह-काम-कोह-दोश-कोसु-मोसो कौन?  
कलिहूँ जो सीखि लई मेरियै मलीनता।

९६

एकु ही भरोसो राम! रावरो कहावत हौं,  
रावरे दयालु दीनबंधु ! मेरी दीनता ॥  
रावरो कहावौं, गुनु गावौं राम! रावरोइ,  
रोटी द्वै हौं पावौं राम! रावरी हीं कानि हौं।  
जानत जहानु, मन मेरेहूँ गुमानु बडो,  
मान्यो मैं न दूसरो, न मानत, न मानिहौं ॥  
पाँचकी प्रतीति न भरोसो मोहि आपनोई,  
तुम्ह अपनायो हौं तबै हीं परि जानिहौं।  
गढि-गुढि छोलि-छालि कुंदकी-सी भाई बातें  
जैसी मुख कहौं, तैसी जीयँ जब आनिहौं ॥

बचन,बिकारु,करतबउ खुआर, मनु  
 बिगत-बिचार, कलिमलको निधानु है।  
 रामको कहाइ,नामु बेचि-बेचि, खाइ सेवा-  
 संगति न जाइ, पाछिलरको उपखानु है ॥  
 तेहू तुलसीको लोगु बलो-भलो कहै, ताको  
 दूसरो न हेतु,एकु नीकें कै निदानु है।

९७

लोकरीति विदित बिलोकिअत जहाँ-तहाँ,  
 स्वामीकें सनेहँ स्वानहू को सनमानु है ॥  
 नाम-विश्वास

स्वारथको साजु न समाजु परमारथको,  
 मोसो दगाबाज दूसरो न जगजाल है।  
 कै न आयों,करौं न करौंगो करतूति भली,  
 लिखी न बिरंचिहूँ भलाइ भूलि भाल है ॥

रावरी सपथ, रामनाम ही की गति में,  
 इहाँ झूठो,झूठो सो तिलोक तिहूँ काल है।  
 तुलसी को भलो पै तुम्हारें ही किउँ कृपाल,  
 कीजै न बिलंबु बलि, पानीभरी खाल है ॥  
 रागुको न साजु, न बिरागु, जोग जाग जियँ  
 काया नहिँ छाडि देत ठाटिबो कुठाटको।

९८

मनोराजु करत अकाजु भयो आजु लगि,  
 चाहे चारु चीर, पै लहै न टूकु टाटको ॥  
 भयो करतारु बडे कूरको कृपालु, पायो  
 नामुप्रेमु-पारसु, हौं लालची बराटको।  
 'तुलसी' बनी है राम! रावरें बनाएँ, नातो  
 धोबी-कैसो कूररु न घरको, न घाटको ॥  
 ऊँचो मनु, ऊँची रुचि, भागु नीचो निपट ही,

लोकरीति-लायक न, लंगर लवारु है ॥  
 स्वारथु अगमु परमारथकी कहा चली,  
 पेटकीं कठिन जगु जीवको जवारु है ॥  
 चाकरी न आकरी, न खेती, न बनिज-भीख,  
 जानत न कूर कछु किसब कवारु है।  
 तुलसीकी बाजी राखि रामहीके नाम, न तु  
 भेंट पितरन को न मूडहू में बारु है ॥

९९

अपत-उतार, अपकारको अगारु, जग  
 जाकी छाँह छुएँ सहमत व्याध-बाधको।  
 पातक-पुहुमि पालिबेको सहसाननु सो,  
 काननु कपटको, पयोधि अपराधको ॥  
 तुलसी-से भामको भो दाहिनो दयानिधानु,  
 सुनत सिहात सब सिध्द साधु साधको।  
 रामनाम ललित-ललामु कियो लाखनिको,  
 बडो कूर कायर कपूत-कौडी आधको ॥  
 सब अंग हीन, सब साधन बिहीन मन-  
 बचन मलीन, हीन कुल करतूति हौं।  
 बुधि-बल-हीन, भाव-भगति-बिहीन, हीन  
 गुन, ग्यानहीन, हीन भाग हूँ बिभूति हौं ॥  
 तुलसी गरीब की गई-बहोर रामनामु,  
 जाहि जपि जीहँ रामहू को बैठो धूति हौं।  
 प्रीति रामनामसों प्रतीति रामनामकी,  
 प्रसाद रामनामके पसारि पाय सूतिहौं

१००

मेरें जान जबतें हौं जीव है जनम्यो जग,  
 तबतें बेसाह्यो दाम लोह, कोह, कामको।  
 मन तिन्हीकी सेवा, तिन्हि सों भाउ निको,  
 बचन बनाइ कहौं हौं गुलामु रामको

नाथहूँ न अपनायो, लोक झूठी है परी, पै  
 प्रभुहूँ तें प्रबल प्रतापु प्रभूनामको।  
 आपनीं भलाई भलो कीजै तौ भलाई, न तौ  
 तुलसीको खुलैगो खजानो खोटे दामको  
 जोग न बिरागु, जप, जाग, तप, त्यागु, व्रत,  
 तीरथ न धर्म जानौं, वेदविधि किमि है।  
 तुलसी-सो पोच न भयो है, नहि व्हेहै कहुँ,  
 सोचैं सब, याके अघ कैसे प्रभु छमिहैं ॥  
 मेरें तो न डरु, रघुबीर! सुनौ, साँची कहौं,  
 खल अनखैहैं तुम्हैं, सज्जन न गमिहैं।  
 भले सुकृतीके संग मिहि तुलौं तौलिए तौ,  
 नामकें प्रसाद भारू मेरी ओर नमिहैं ॥

१०१

जातिके, सुजातिके, कुजातिके पेटागि बस  
 खाए टूक सबके, विदित बात दुनीं सो।  
 मानस-बचन-कायँ किए पाप सतिभायँ,  
 रामको कहाइ दासु दगाबाज पुनी सो।  
 रामनामको प्रभाउ, पाउ, महिमा, प्रतापु,  
 तुलसी-सो जग मनिअत महामुनी-सो।  
 अतिहीं अभागो, अनुरागत न रामपद,  
 मूढ! एतो बडो अचिरिजु देखि-सुनी सो ॥  
 जायो कुल मंगन, बधावनो बजायो, सुनि  
 भयो परितापु पापु जननी-जनकको ॥  
 बारेतें ललात-बिललात द्वार-द्वार दीन,  
 जानत हो चारि फल चारि ही चनकको ॥  
 तुलसी सो साहेब समर्थको सुसेवकु है,  
 सुनत सिहात सोचु विधिहूँ गनकको।  
 नामु राम! रावरो सयानो किधौं बावरो,  
 जो करत गिरीतें गरु तूनतें तनकको ॥

१०२

बेदहूँ पुरान कही, लोकहहूँ बिलोकिअत,  
 रामनाम ही सों रीझें सकल भलाई है।  
 कासीहू करत उपदेसत महेसु सोई,  
 साधना अनेक चितई न चित लाई है ॥

छाछीको ललात जे, ते रामनामकें प्रसाद,  
 खात, खुनसात सोंधे दूधकी मलाई है।  
 रामराज सुनिअत राजनीतिकी अवधि,  
 नामु राम! रावरो तौ चामकी चलाई है ॥

सोच-संकटनि सोचु संकटु परत, जर  
 जरत, प्रभाउ नाम ललित ललामको।  
 बूडिऔ तरति विगरीऔ सुधरति बात,  
 होत देखि दाहिनो सुभाउ बिधि बामको ॥

भागत अभाग, अनुरागत बिरागु, भागु  
 जागत आलसि तुलसीहू-से निकामको।  
 धाई धारि फिरिकै गोहारि हितकारी होति,  
 आई मीचु मिटति जपत रामनामको ॥

१०३

आँधरो अधम ज़ड जाजरो जराँ जवनु  
 सूकरकें सावक ढकाँ ढकेल्यो मगमें।

गिरो हिउँ हहरि 'हराम हो, हराम हन्यो'  
 हाय! हाय करत परीगो कालफगमें ॥

'तुलसी'बिसोक है त्रिलोकपति लोक गयो  
 नामकें प्रताप, बात बिदित है जगमें।  
 सोई रामनामु जो सनेहसों जपत जनु,  
 ताकी महिमा क्यों कही है जाति अगमें ॥

जापकी न तप-खपु कियो, न तमाइ जोग,  
 जाग न बिराग, त्याग, तीरथ न तनको।  
 भाईको भरोसो न खरो-सो बैरु बैरीहू सों,

बलु अपनो न, हितू जननी न जनको ॥

लोकको न डरु, परलोकको न सोचु, देव-  
सेवा न सहाय, गर्बु धामको न धनको।  
रामही के नामते जो होई सोई नीको लागै,  
ऐसोई सुभाउ कछु तुलसीके मनको ॥

१०४

ईसु न, गनेसु न, दिनेसु न, धनेसु न,  
सुरेसु, सुर, गौरि, गिरापति नहि जपने।  
तुम्हरेई नामको भरोसो भव तरिवेको,  
बैठे-उठे, जागत-बागत, सोएँ सपनें ॥  
तुलसी है बावरो सो रावरोई रावरी सौं,  
रावरेऊ जानि जियँ कीजिए जु अपने।  
जानकीरमन मेरे! रावरें बदनु फेरें,  
ठाउँ न समाउँ कहाँ, सकल निरपने ॥  
जाहिर जहानमें जमानो एक भाँति भयो,  
बेंचिए बिबुधधेनु रासभी बेसाहिए।  
ऐसेऊ कराल कलिकालमें कृपाल ! तेरे  
नामकें प्रताप न त्रिताप तन दाहिए ॥  
तुलसी तिहारो मन-वचन-करम, तेंहि  
नातें नेह-नेमु निज ओरतें निबाहिए।  
रंकके नेवाज रघुराज ! राजा राजनिके,  
उमरि दराज महाराज तेरी चाहिए ॥

१०५

स्वारथ सयानप, प्रपंचु परमारथ,  
कहायो राम! रावरो हौं, जानत जहान है।  
नामकें प्रताप बाप ! आजु लौं निबाही नीकें,  
आगेको गोसाई ! स्वामी सबल सुजान है ॥  
कलिकी कुचालि देखि दिन-दिन दूनी, देव!  
पाहरूई चोर हेरि हिए हहरान है।

तुलसीकी ,बलि, बार-बारहीं सँभार कीबी,  
 जद्यपि कृपानिधानु सदा सावधान है ॥  
 दिन-दिन दूनो देखि दारिदु, दुकालु, दुखु,  
 दुरित दुराजु सुख-सुकृत सकोच है।  
 मार्गें पैत पावत पचारि पातकी प्रचंड,  
 कालकी करालता, भलेको होत पोच है ॥  
 आपनें तौ एकु अवलंबु अंब डिंभ ज्यों,  
 समर्थ सीतानाथ सब संकट बिमोच है।

१०६

तुलसीकी साहसी सराहिए कृपाल राम!  
 नामकें भरोसें परिनामको निसोच है ॥  
 मोह-मद मात्यो, रात्यो कुमति-कुनारिसों,  
 बिसारि बेद-लोक-लाज, आँकरो अचेतु है।  
 भावे सो करत, मुँह आवै सो कहत, कछु  
 काहूकी सहत नाहिं, सरकश हेतु है ॥  
 तुलसी अधिक अधमाई हू अजामिलतें,  
 ताहूमें सहाय कलि कपटनिकेतु है।  
 जैबेको अनेक टेक, एक टेक हूँबेकी, जो  
 पेट-प्रियपूत हित रामनामु लेतु है ॥

कलिवर्णन

जागिए न सोइए, बिगोइए जनमु जाँ,  
 दुख, रोग रोइए, कलेसु कोह-कामको।

१०७

राजा-रंक, रागी ओ बिरागी, भूरिभागी, ये  
 अभागी जीव जरत, प्रभाउ कलि बामको ॥  
 तुलसी! कबंध-कैसो धाइबो बिचारु अंध !  
 धंध देखिअत जग, सोचु परिनामको।  
 सोइबो जो रामके सनेहकी समाधि-सुखु,

जागिबो जो जीह जपै नीकें रामनामको ॥

बरन-धरम गयो, आश्रम निवासु तज्यो,  
त्रासन चकित सो परावनो परो-सो है।  
करमु उपासना कुबासनाँ बिनास्यो ग्यानु,  
बचन-बिराग, बेष जगतु हरो-सो है ॥

गोरख जगायो जोगु, भगति भगायो लोगु,  
निगम-नियोगतें सो केल ही छरो-सो है।  
कार्यँ-मन-बचन सुभायँ तुलसी है जाहि  
रामनामको भरोसो, ताहिको भरोसो है ॥

१०८

बेद-पुरान बिहाइ सुपंथु, कुमारग, कोटि कुचालि चली है।  
कालु कराल, नृपाल कृपाल न, राजसमाजु बडोई छली है ॥  
बर्न-बिभाग न आश्रमधर्म, दुनी दुख-दोष-दरिद्र-दली है।  
स्वारथको परमारथको कलि रामको नामप्रतापु बली है ॥  
न मिटे भवसंकट, दुर्घट हे तप, तीरथ जन्म अनेक अटो।  
कलिमें न बिरागु, न ग्यानु कहुँ, सबु लागत फोकट झूठ-जटो ॥  
नटु ज्यों जनि पेट-कुपेटक कोटिक चेटक-कौतुक-ठाट ठटो।  
तुलसी जो सदा सुखु चाहिअ तौ, रसनाँ निसि-बासर रामु रटो ॥  
दम दुर्गम, दान, दया, मख, कर्म, सुधर्म अधीन सबै धनको।  
तप, तीरथ, साधन, जोग, बिरागसों होइ, नहीं दृढता तनको ॥  
कलिकाल करालमुं रामकृपालु यहै अवलंबु बडो मनको।  
'तुलसी'सब संजमहीन सबै, एक नाम-अधारु सदा जनको  
पाइ सुदेह बिमोह-नदी-तरनी न लही, करनी न कछू की।  
रांकथा बरनी न बनाइ, सुनी न कथा प्रह्लाद न ध्रुकी ॥

१०९

अब जोर जरा जरि गातु गयो, मन मानि गलानि कुबानि न मूकी।  
नीकें कै ठीक दर्ई तुलसी, अवलंब बडी उर आखर दूकी ॥

राम-नाम-महिमा

रामु बिहाइ 'मरा' जपतें बिगरी सुधरी कबिकोकिलहू की।  
 नामहि तें गजकी, गनिकाकी, अजामिलकी चलि गै चलचूकी ॥  
 नामप्रताप बड़ें कुसमाज बजाइ रही पति पांडुबधूकी।  
 ताको भलो अजहूँ 'तुलसी' जेहि प्रीति-प्रतीति है आखर दूकी ॥  
 नाम अजामिल-से खल तारन, तारन बारन-बारबधुको।  
 नाम हरे प्रह्लाद-बिषाद, पिता-भय-साँसति सागरु सूको ॥  
 नामसों प्रीति-प्रतीति बिहीन गिल्यो कलिकाल कराल, न चूको।  
 राखिहैं रामु सो जासु हिणँ तुलसी हुलसै बलु आखर दूको

११०

जीव जहानमें जायो जहाँ, सो तहाँ, 'तुलसी' तिहुँ दाह दहो है।  
 दोसु न काहु, कियो अपनो, सपनेहूँ नहीं सुखलेसु लहो है ॥  
 रामके नामतें होउ सो होउ, न सोउ हिणँ, रसना हीं कहो है।  
 कियो न कछू करिबो न कछू कहिबो न कछू मरिबोइ रहो है ॥  
 जीजे न ठाउँ, न आपन गाउँ, सुरालयहू को न संबलु मेरें।  
 नामु रटो, जमबास क्यों जाउँ को आइ सकै जमकिंकरु नेरें ॥  
 तुम्हरो सब भाँति तुम्हारिअ सों, तुम्हही बलि हौ मोको ठाहरु हेरें।  
 बैरख बाँह बसाइए पै तुलसी-घरु ब्याध-अजामिल-खेरें ॥  
 का कियो जोगु अजामिलजू गनिकाँ मति पेम पगाई।  
 ब्याधको साधुपनो कहिए, अपराध अगाधनि में ही जनाई ॥  
 करुनाकरकी करुना करुना हित, नाम-सुहेत जो देत दगाई।  
 काहेको खीझिअ रीझिअ पै, तुलसीहु सों है, बलि सोइ सगाई ॥

१११

जे मद-मार-बिकार भरे, ते अचार-बिचार समीप न जाहीं।  
 है अभिमानु तऊ मनमें, जनु भाषिहै दूसरे दीनन पाहीं? ॥  
 जौ कछु बात बनाइ कहौं, तुलसी तुम्हमें, तुम्हहू उर माहीं।  
 जानकीजीवन! जानत हौ, हम हैं तुम्हरे, तुम में, सकु नाहीं

दानव-देव, अहीस-महीस, महामुनि-तापस, सिध्द-समाजी ।  
जग-जाचक, दानि दुतीय नहीं, तुम्ह ही सबकी सब राखत बाजी ॥  
एते बडे तुलसीस! तऊ सबरीके दिए बिनु भूख न भाजी ।  
राम गरीबनेवाज! भए हौ गरीबनेवाज गरीब नेवाजी ॥  
किसबी, किसान-कुल, बनिक, भिखारी, भाट,  
चाकर, चपल नट, चोर, चार चेटकी ।

११२

पेटको पढत गुन गढत, चढत गिरि,  
अटत गहन-गन अहन अखेटकी ॥  
ऊँचे-नीचे करम, धरम-अधरम करि,  
पेट ही को पचत, बेचत बेटा-बेटकी ।  
'तुलसी' बुझाइ एक राम घनस्याम ही तें,  
आगि बडवागितें बडी है आगि पेटकी ॥  
खेती न किसानको, भिखारीको न भीख, बलि,  
बनिकको बनज, न चाकरको चाकरी ।  
जीविका बिहीन लोग सीधमान सोच बस,  
कहैं एक एकन सोंकहाँ जाई, का करी ?  
बेदहूँ पुरान कही, लोकहूँ बिलोकित,  
साँकरे सबै पै, राम! रावरें कृपा करी ।  
दारिद-दसानन दबाई दुनी, दीनबंधु!  
दुरित-दहन देखि तुलसी हहा करी ॥

११३

कुल- करतूति-भूति-कीरति-सुरूप-गुन-  
जौबन जरत जुर, परै न कल कहीं ।  
राजकाजु कुपथ, कुसाज भोग रोग ही के,  
बेद-बुध बिद्या पाइ बिबस बलकहीं ॥  
गति तुलसीकी लखै न कोउ, जो करत  
पब्बयतें छार, छारे पब्बय पलक हीं ।  
कासों कीजै रोषु दीजै काही, पाहि राम!

कियो कलिकाल कुलि खललु खलक हीं ॥

बबुर-बहरेको बनाइ बागु लाइयत,  
 रूंधिवेको सोई सुरतरु काटियतु है।  
 गारी देत नीच हरिचंदहू दधीचिहू को,  
 आपने चना चबाइ हाथ चाटियतु है ॥

आपु महापातकी, हँसत हरि-हरहू को,  
 आपु है अभागी, भरिभागी डाटियतु है।  
 कलिको कलुष मन मलिन किए महत,  
 मसककी पाँसुरी पयोधि पाटियतु है ॥

११४

सुनिए कराल कलिकाल भूमिपाल! तुम्ह,  
 जाहि घालो चाहिए, कहौ धौं राखै ताहि को।  
 हौ तौ दीन दूबरो, बिगारो-ढारी रावरो न,  
 मैंहू तैंहू ताहिको, सकल जगु जाहिको ॥

काम,कोहू लाइ कै देखाइयत आँखि मोहि,  
 एते मान अकसु कीबेको आपु आहि को ॥

साहेबु सुजान, जिन्ह स्वानहूँ को पच्छु कियो,  
 रामबोला नामु, हौं गुलामु रामसाहिको ॥

११५

साँची कहौ, कलिकाल कराल !मैंं ढारो-बिगारो तिहारो कहा है।  
 कामको, कोहको, लोभको, मोहको मोहिसों आनि प्रपंचु रहा है ॥

हौ जगनायकु लायक आजु, पै मेरिऔं टेव कुटेव महा है।  
 जानकीनाथ बिना 'तुलसी' जग दूसरेसों करिहौं न हहा है ॥

भागीरथी-जलु पानकरौं, अरु नाम कै रामके लेत नितै हौं।  
 मोको न लेनो, न देनो कछू कलि ! भूली न रावरी ओर चितैहौं ॥

जानि कै जोरु करौं, परिनाम तुम्है पछितैहौं, पै मैंं न भितैहौं।  
 ब्राह्मन ज्यों उगिल्यो उरगारि, हौं त्यों हीं तिहारें हिउँ न हितैहौं ॥

राजमरालके बालक पेलि कै पालत-लालत खूसरको ।  
सुचि सुंदर सालि सकेलि, सो बारि कै बीजु बटोरत ऊसरको ॥  
गुन-ग्यान-गुमानु, भँभेरि बड़ी, कलपद्रुमु काटत मूसरको ।  
कलिकाल बिचारु अचारु हरो, नहिं सूझै कछु धमधूसरको ॥

११६

कीबे कहा, पढिबेको कहा फलु, बूझि न बेदको भेटु बिचारै ।  
स्वारथको परमारथको कलि कामद रामको नामु बिसारै ॥  
बाद-बिबाद विषादु बढाइ कै छाती पराई औ आपनी जाँरै ।  
चारिहुको, छहुको, नवको, दस-आठको पाठु कुकाठु ज्यौं फारै ॥  
आगम बेद, पुरान बखानत मारग कोटिन, जाहिं न जाने ।  
जे मुनि ते पुनि आपुहि आपुको ईसु कहावत सिध्द सयाने ॥  
धर्म सबै कलिकाल ग्रसे, जप,जोग बिरागु लै जीव पराने ।  
को करि सोचु मरै 'तुलसी' हम जानकीनाथके हाथ बिकाने ॥  
धूत कहौ, अवधूत कहौ, रजपूतु कहौ, जोलहा कहौ कोऊ ।  
काहूकी बेटीसों बेटा न व्याहव, काहूकी जाति बिगार न सोऊ ॥

११७

तुलसी सरनाम गुलामु है रामको, जाको रुचै सो कहै कछु ओऊ ।  
माँगि कै खैबौ, मसीतको सोइबो, लैबोको एकु न दैबेको दोऊ ॥  
मेरें जाति-पाँति न चहौं काहूकी जाति-पाँति,  
मेरे कोऊ कामको न हौं काहूके कामको  
लोकु परलोकु रघुनाथही के हाथ सब,  
भारी है भरोसो तुलसीके एक नामको ॥  
अतिही अयाने उपखानो नहि बूझैं लोग,  
'साह ही को गोतु गोतु होत है गुलामको ॥  
साधु कै असाधु, कै भलो कै पोच, सोचु कहा,  
काकाहूके द्वार परौं, जो हौं सो हौं रामको ॥  
कोऊ कहै, करत कुसाज, दगाबाज बडो,  
कोऊ कहै रामको गुलामु खरो खूब है ।

साधु जानै महासाधु, खल जानै महाखल,  
बानी झूँठी-साँची कोटि उठत हबूब है ॥

चहत न काहूसों न कहत काहूकी कछू  
सबकी सहत, उर अंतर न ऊब है।  
तुलसीको भलो पोच हाथ रघुनाथही के  
रामकी भगति-भूमि मेरी मति दूब है ॥

११८

जागैं जोगी-जंगम, जती-जमाती ध्यान धरैं  
डरैं उर भारी लोभ, मोह, कोह, कामके।  
जागैं राजा राजकाज, सेवक-समाज, साज,  
सोचैं सुनि समाचार बडे बैरी बामके ॥

जागैं बुध बिद्या हित पंडित चकित चित,  
जागैं लोभी लालच धरनि, धन धामके।  
जागैं भोगी भोग हीं, बियोगी, रोगी सोगबस,  
सोवैं सुख तुलसी भरोसे एक रामके ॥

रामु मातु, पितु, बंधु, सुजन, गुरु, पूज्य, परमहित।  
साहेबु, सखा, सहाय, नेह-नाते, पुनीत चित ॥

देसु, कोसु, कुल, कर्म, दर्म, धनु, धाम, धरनि, गति।  
जाति-पाँति सब भाँति लागि रामहि हमारि पति ॥

११९

महाराज, बलि जाउँ, राम ! सेवक-सुखदायक ।

महाराज, बलि जाउँ, राम ! सुन्दर सब लायक ॥

महाराज, बलि जाउँ, राम ! राजीवबिलोचन ॥

बलि जाउँ, राम ! करुनायतन, प्रनतपाल, पातकहरन।

बलि जाउँ, राम ! कलि-भय-बिकल तुलसिदासु राखिअ सरन ॥

जय ताडका-सुबाहु-मथन मारीच-मानहर!

मुनिमख-रच्छन-दच्छ, सिलातारन, करुनाकर !

नृपगन-बल-मद सहित संभु-कोदंड-विहंडन !  
जय कुठारधरदर्पदलन दिनकरकुलमंडन ॥  
जय जनकनगर-आनंदप्रद, सुखसागर, सुषमाभवन।  
कह तुलसिदासु सुरमुकुमनि, जय जय जय जानकिरमन ॥

१२०

जय जयंत-जयकर, अनंत, सज्जनजनरंजन!  
जय विराध-बध-बिदुष, बिबुध-मुनिगन-भय-भंजन  
जय निसिचरी-बिरूप-करन रघुवंसविभूषन!  
सुभट चतुर्दस-सहस दलन त्रिसिरा-खर-दूषन ॥  
जय दंडकवन-पावन-करन,तुलसिदास-संसय-समन!  
जगबिदित जगतमनि, जयति जय जय जय जानकिरमन!  
जय मायामृगमथन, गीध-सबरी-उध्दारन !  
जय कबंधसूदन बिसाल तरु ताल बिदारन !  
दवन बालि बलसालि, थपन सुग्रीव, संतहित !  
कपि कराल भट भालु कटक पालन,कृपालचित!  
जय सिय-बियोग-दुख हेतु कृत-सेतुबंध बारिधिदमन !  
दससीस बिभीषन अभयप्रद, जय जय जय जानकिरमन !

१२१

रामप्रेमकी प्रधानता

कनककुधरु केदारु, बीजु सुंदर सुरमनि बर।  
सींचि कामधुक धेनु सुधामय पय बिसुध्दतर ॥  
तीरथपति अंकुरसरूप जच्छेस रच्छ तेहि।  
मरकतमय साखा-सुपुत्र, मंजरय लच्छि जेहि ॥  
कैवल्य सकल फल, कलपतरु,सुभ सुभाव सब सुख बरिस।  
जाय सो सुभटु समर्थ पाइ रन रारि न मंडै।  
जाय सो जती कहाय बिषय-बासना न छंडै ॥  
जाय धनिकु बिनु दान, जाय निर्धन बिनु धर्महि।  
जाय सो पंडित पढि पुरान जो रत न सुकर्महि ॥  
सुत जाय मातु-पितु-भक्ति बिनु, तिय सो जाय जेहि पति न हित।

सब जाय दासु तुलसी कहै, जौं न रामपद नेहु नित ॥

१२२

को न क्रोध निरदह्यो, काम बस केहि नहि कीन्हो?  
 को न लोभ दृढ फंद बाँधि त्रासन करि दीन्हो ?  
 कौन हृदयँ नहि लाग कठीन अति नारि-नयन-सर?  
 लोचनजुत नहि अंध भयो श्री पाइ कौन नर ?  
 सुर-नाग-लोक महिमंडलहुँ को जु मोह कीन्हो जय न ?  
 कह तुसिदासु सो ऊबरै, जेहि राख रामु राजिवनयन ॥  
 भौह-कमान सँधान सुठान जे नारि-बिलोकनि-बानतें बाँचे।  
 कोप-कृसानु गुमान-अवाँ घट-ज्यों जिनके मन आव न आँचे।  
 लोभ सबै नटके बस है कपि-ज्यों जगमें बहु नाच न नाचे  
 नीके हैं साधु सबै तुलसी, पै तेई रघुबीरके सेवक साँचे ॥  
 बेष सुबनाइ सुचि बचन कहैं चुवाइ  
 जाइ तौ न जरनि धरनि-धन-धामकी।

१२३

कोटिक उपाय करि लालि पालिअत देह,  
 मुख कहिअत गति रामहीके नामकी ॥  
 प्रगटैं उपासना, दुरावैं दुरबासनाहि,  
 मानस निवासभूमि लोभ-मोह-कामकी।  
 राग-रोष-इरिषा-कपट-कुटिलाई भरे  
 तुलसी-से भगत भगति चहैं रामकी ॥  
 कालिहीं तरुन तन, कालिहीं धरनि-धर,  
 कालिहीं जितौंगो रन, कहत कुचालि है।  
 कालिहीं साधौंगो काज, कालिहीं राजा-समाज,  
 मसक है कहै, 'भार मेरे मेरु हालिहै ॥  
 तुलसी यही कुभाँति घने घर घालि आई,  
 घने घर घालति है, घने घर घालिहै।  
 देखत- सुनत-समुझतहू न सूझै सोई,

कबहूँ कछो न कालहू को कालु कालि है ॥

१२४

रामभक्तिकी याचना

भयो न तिकाल तिहूँ लोक तुलसी-सो मंद,  
निदैं सब साधु, सुनि मानौं न सकोचु हौं।  
जानत न जोगु हियँ हानि मानैं जानकीसु,  
काहेको परेखो, पापी प्रपंची पोचु हौं ॥

पेट भरिबेके काज महाराजको कहायों  
महाराजहूँ कछो है प्रनत-बिमोचु हौं।  
निज अघजाल, कलिकालकी करालता  
बिलोकि होत ब्याकुल, करत सोई सोचु हौं ॥

धर्म कैं सेतु जगमंगलके हेतु भूमि-  
भारु हरिबेको अवतारु लियो नरको।  
नीति औ प्रतीति-प्रीतिपाल चालि प्रभु मानु  
लोक-बेद राखिबेको पनु रघुबरको ॥

बानर-बिभीषनकी ओर के कनावडे हैं,  
सो प्रसंगु सुनें अंगु जरे अनुचरको।  
राखे रीति आपनी जो होइ सोई कीजै, बलि,  
तुलसी तिहारो घर जायऊ है घरको ॥

१२५

नाम महाराजके निबाह नीको कीजै उर  
सबही सोहात, मैं न लोगनि सोहात हौं।  
कीजै राम! बार यहि मेरी ओर चष-कोर  
ताहि लागि रंक ज्यों सनेह को ललात हौं ॥

तुलसी बिलोकि कलिकालकी करालता  
कृपालको सुभाउ समुझत सकुचात हौं  
लोक एक भाँतिको, त्रिलोकनाथ लोकबस  
आपनो न सोचु, स्वामी-सोचहीं सुखात हौं ॥

प्रभुकी महत्ता और दयालुता

तौलौं लोभ लोलुप ललात लालची लवार,  
बार-बार लालचु धरनि-धन-धामको।

१२६

तबलौं बियोग-रोग-सोग, भोग जातनाको  
जुग सम लागत जीवनु जाम-जामको।  
तौलौं दुख-दारिद दहत अति नित तनु  
तुलसी है किकरु बिमोह-कोह-कामको।  
सब दुख आपने, निरापने सकल सुख,  
जौलौं जनु भयो न बजाइ राजा रामको ॥

तौलौं मलीन, हीन दीन, सुख सपनें न,  
जहाँ-तहाँ दुखी जनु भाजनु कलेसको।  
तौलौं उबेने पाय फिरत पेटौ खलाय  
बाय मुह सहत पराभौ देस-देसको।  
तबलौं दयावनो दुसह दुख दारिदको,  
साथरीको सोइबो, ओढिबो झूने खेसको ॥  
जबलौं न भजै जीहँ जानकी-जीवन राम,  
राजनको राजा सो तौ साहेबु महेसको ॥

ईसनके ईस, महाराजनके महाराज,  
देवनके देव, देव! प्रानहुके प्रान हौ।

१२७

कालहूके काल, महाभूतनके महाभूत,  
कर्महूके करम, निदानके निदान हौ।  
निगम को अगम, सुगम तुलसीहू-सेको  
एते मान सीलसिंधु, करुनानिधान हौ।  
महिमा अपार, काहू बोलको न वारापार,  
बडी साहबीमें नाथ ! बडे सावधान हौ ॥

आरतपाल कृपाल जो रामु जेहीं सुमिरे तेहिको तहँ ठाढे।  
नाम-प्रताप-महामहिमा अँकरे किये खोटेउ छोटेउ बाढे।  
सेवक एकतेँ एक अनेक भए तुलसी तिहुँ ताप न डाढे।

प्रेम बढ़ौं प्रह्लादाहिको, जिन पाहनतें परमेस्वरु काढे ॥

काढि कृपान, कृपा न कहूँ, पितु काल कराल बिलोकि न भागे।  
'राम कहाँ?' सब ठाऊँहैं, 'खंभमें?' 'हाँ' सुनि हाँक नृकेहरि जागे ॥

बैरि बिदारि भए बिकराल, कहें प्रलादहिकें अनुरागे।  
प्रीति-प्रतीति बड़ी तुलसी, तबतें सब पाहन पूजन लागे ॥

१२८

अंतरजामिहुतें बडे बाहेरजामि हैं राम, जे नाम लियेतें।  
धावत धेनु पेन्हाइ लवाई ज्यों बालक-बोलनि कान कियेतें ॥  
आपनि बूझि कहै तुलसी, कहिबेकी न बावरि बात बियेतें।  
पैज परें प्रह्लादहुको प्रगटे प्रभु पाहनतें, न हियेतें ॥  
बालकु बोलि दियो बलि कालको कायर कोटि कुचालि चलाई।  
पापी है बाप, बडे परतापतें आपनि ओरतें खोरि न लाई ॥  
भूरि दई विषमूरि, भई प्रह्लाद-सुधार्ई सुधाकी मलाई।  
रामकृपाँ तुलसी जनको कग होत भलेको भलाई भलाई ॥  
कंस करी बृजवासिन पै करतूति कुभाँति, चली न चलाई।  
पंडूके पूत सपूत, कपूत सुजोधन भो कलि छोटो छलाई ॥

१२९

कान्ह कृपाल बडे नतपाल, गए खल खेचर खीस खलाई।  
ठीक प्रतीति कहै तुलसी, जग होई भले को भलाई भलाई ॥  
अवनीस अनेक भए अवनीं, जिनके डरतें सुर सोच सुखाहीं।  
मानव-दानव-देव सतावन रावन घाटि रच्यो जग माहीं ॥  
ते मिलिये धरि धूरि सुजोधनु, जे चलते बहु छत्रकी छाँहीं।  
बेद पुरान कहैं, जगु जान, गुमान, गोबिंदहि भावत नाहीं ॥

गोपियोंका अनन्य प्रेम

जब नैनन प्रीति ठई ठग स्याम सों, स्यानी सखी हठि हौं बरजी।  
नहि जानो बियोगु-सो रोगु है आगें, झुकी तब हौं तेहि सों तरजी ॥  
अब देह भई पट नेहके घाले सों, ब्यौत करै बिरहा-दरजी।

ब्रजराजकुमार बिना सुनु भृंग ! अनंगु भयो जियको गरजी ॥

१३०

जोग-कथा पठई ब्रजको, सब सो सठ चेरीकी चाल चलाकी।  
ऊधौ जू! क्यों न कहै कुबरी, जो बरी नटनागर हेरि हलाकी ॥  
जाहि लगै परि जाने सोई, तुलसी सो सोहागिनि नंदललाकी।  
जानी है जानपनी हरिकी, अब बाँधियैगी कछु मोटि कलाकी ॥

पठयो है छपदु छबीलें कान्ह कैहूँ कहुँ  
खौजिकै खवासु खासो कुबरी-सी बालको।  
ग्यानको गढैया, विनु गिराको पढैया, बार-  
खालको कढैया, सो बढैया उर-सालको ॥

प्रीतिको बधीक, रस रीतिको अधिक, नीति-  
निपुन, विवेकु है, निदेसु देस-कालको।  
तुलसी कहें न बनै, सहें ही बनैगी सब  
जोगु भयो जोगको बियोगु नंदलालको ॥

१३१

विनय

हनुमान व्हे कृपाल, लाडिले लखनलाल!  
भावते भरत! कीजै सेवक-सहाय जू।  
बिनती करत दीन दूबरो दयावनो सो  
बिगरेतें आपु ही सुधारि लीजे भाय जू ॥

मेरी साहिबिनी सदा सीसपर बिलसति  
देवि क्यों न दासको देखाइयत पाय जू।  
खीझहमें रीझिबेकी बानि सदा रीझत हैं,  
रीझे हैं, रामकी दोहाई, रघुराय जू ॥

बेष बिरागको, राग भरो मनु माय! कहौ सतिभाव हौं तोसों।  
तेरे ही नाथको नामु लै बेचि हौं पातकी पावँर प्राननि पोसों ॥  
एते बडे अपराधी अघी कहुँ, तैं कहु, अंब! कि मेरो तूँ मोसों।  
स्वारथको परमारथको परिपुरन भो, फिरि घाटि न होसों ॥

१३२

सीतावट-वर्णन

जहाँ बालमीकि भए ब्याधतें मुनिंदु साधु

'मरा मरा' जपें सिख सुनि रिषि सातकी।

सीयको निवास, लव-कुसको जनमथल

तुलसी छुवत छाँह ताप गरै गातकी ॥

बिटपमहीप सुरसरित समीप सोहै,

सीताबटु पेखत पुनीत होत पातकी।

बारिपुर दिगपुर बीच बिलसति भूमि,

अंकित जो जानकी-चरन-जलजातकी ॥

मरकतवरन परन, फल मानिक-से

लसै जटाजूट जनु रूखबेष हरु है।

सुषमाको डैरु कैधौं सुकृत-सुमेरु कैधौं,

संपदा सकल मुद-मंगलको घरु है ॥

देत अभिमत जो समेत प्रीति सेइये

प्रतीति मानि तुलसी, बिचारि काको थरु है।

सुरसरि निकट सुहावनी अवनि सोहै

रामरवनिको बटु कलि कामतरु है ॥

१३३

देवधुनि पास, मुनिबासु, श्रीनिवासु जहाँ,

प्राकृतहूँ बट-बूट बसत पुरारि हैं।

जोग-जप-जागको, बिरागको पुनीत पीठु

रागिनि पै सीठि डीठि बाहरी निहारि हैं ॥

'आयसु', 'आदेस', 'बाबू' भलो-भलो भावसिध्द

तुलसी बिचारि जोगी कहत पुकारि हैं।

राम-भगतनको तौ कामतरुतें अधिक,

सियबटु सेयें करतल फल चारि हैं ॥

चित्रकूट-वर्णन

जहाँ बनु पावनो सुहावने बिहंग-मृग,  
देखि अति लागत अनंदु खेत-खूँट-सो।

१३४

सीता-राम-लखन-निवासु, बासु मुनिनको,  
सिध्द-साधु-साधक सबै बिबेक-बूट-सो ॥

झरना झरत झारि सीतल पुनीत बारि,  
मंदाकिनि मंजुल महेसजटाजूट-सो।  
तुलसी जौं रामसो सनेहु साँचो चाहिये तौ,  
सेइये सनेहसों बिचित्र चित्रकूट सो ॥

मोह-बन-कलिमल-पल-पीन जानि जिय  
साधु-गाइ-बिप्रनके भयको नेवारिहै।  
दीन्हीहै रजाइ राम, पाइ सो सहाइ लाल  
लखन समत्थ वीर हेरि-हेरि मारिहै ॥

मादाकिनी मंजुल कमान असि,बान जहाँ  
बारि-धार धीर धरि सुकर सुधारिहै।  
चित्रकूट अचल अहेरि बैठ्यो घात मानो  
पातकके ब्रात घोर सावज सँधारिहै ॥

लागि दवारि पहार ठही, लहकी कपि लंक जथा खरखौकी।  
चारु चुआ चहुँ ओर चलै, लपटै-झपटै सो तमीचर तौकी ॥

१३५

क्यों कहि जात महासुषमा, उपमा तकि ताकत है कबि कौं की।  
मानो लसी तुलसी हनुमान हिउँ जगजीति जरायकी चौकी ॥

तीर्थराज-सुषमा

देव कहैं अपनी-अपना, अवलोकन तीरथराजु चलो रे।  
देखि मिटै अपराध अगाध, निमज्जत साधु-समाजु भलो रे ॥  
सोहै सितासितको मिलिबो, तुलसी हुलसै हिय हेरि हलोरे।  
मानो हरे तन चारु चरै बगरे सुरधेनुके धौल कलोरे ॥

श्रीगङ्गा-महात्म्य

देवनदी कहँ जो जन जान किए मनसा, कुल कोटि उधारे।  
देखि चले झगरैँ सुरनारि, सुरेस बनाइ बिमान सँवारे ॥  
पूजाको साजु बिरंचि रचैँ तुलसी, जे महातम जाननिहारे।  
ओककी नीव परी हरिलोक बिलोकत गंग ! तरंग तिहारे ॥

१३६

ब्रह्म जो व्यापकु बेद कहँ, गम नाहिँ गिरा गुन-ग्यान-गुनीको।  
जो करता, भरता, हरता, सुर-साहेबु, साहेबु दीन-दुनीको ॥  
सोइ भयो द्रवरूप सही, जो है नाथु बिरंचि महेस मुनीको।  
मानि प्रतीति सदा तुलसी जलु काहे न सेवत देवधुनीको ॥  
बारि तिहारो निहारि मुरारि भएँ परसेँ पद पापु लहौंगो ॥  
ईस है सीस धरौँ पै डरौँ, प्रभुकी समताँ बडे दोष दहौँगो ॥  
बरु बारहिँ बार सरीर धरौँ, रघुबीरको है तव तीर रहौँगो।  
भागीरथी! बिनवौँ कर जोरि, बहोरि न खोरि लगैँ सो कहौँगो ॥

१३७

अन्नपूर्णा-महात्म्य

लालची ललात, बिललात द्वार-द्वार दीन,  
बदन मलीन, मन मिटै ना बिसूरना।  
ताकत सराध, कै बिबाह, कै उछाह कछू  
डोलै लोल बूझत सबद ढोल-तूरना ॥  
प्यासेहँ न पावै बारि, भूखें न चनक चारि,  
चाहत अहारन पहार, दारि घूर ना।  
सोकको अगार, दुखभार भरो तौलौँ जन  
जौलौँ देबी द्रवै न भवानी अन्नपरना ॥

शंकर-स्तवन

भस्म अंग, मर्दन अनंग, संतत असंग हर।  
सीस गंग, गिरिजा अर्धग, भूषन भुजंगबर ॥

मुंडमाल, बिधु बाल भाल, डमरु कपालु कर।  
 विबुधबुंद-नवकुमुद-चंद, सुखकंद सूलधर ॥  
 त्रिपुरारि त्रिलोचन, दिग्बसन, विषभोजन, भवभयहरन।  
 कह तुलसिदासु सेवत सुलभ सिव सिव सिव संकर सरन ॥

१३८

गरल-असन दिग्बसन व्यसन भंजन जनरंजन।  
 कुंद-इंदु-कर्पर-गौर सच्चिदानंदघन ॥  
 विकटबेष, उर सेष, सीस सुरसरित सहज सुचि।  
 सिव अकाम अभिरामधाम नित रामनाम रुचि ॥  
 कंदर्पदर्प दुर्गम दमन उमारमन गुनभवन हर।  
 त्रिपुरारि! त्रिलोचन! त्रिगुनपर! त्रिपुरमथन! जय त्रिदसवर ॥  
 अरघ अंग अंगना, नामु जोगीसु, जोगपति।  
 विषम असन दिग्बसन, नाम बिस्वेषु बीस्वगति ॥  
 कर कपाल, सिर माल ब्याल, विष-भूति-विभूषन।  
 नाम सुध्द, अबिरुध्द, अमर अनवद्य, अदूषन ॥  
 विकराल-भूत-बेताल-प्रिय भीम नाम, भवभयदमन।  
 सब विधि समर्थ, महिमा अकथ, तुलसिदास-संसय-समन ॥

१३९

भूतनाथ भयहरन भीम भयभवन भूमिधर।  
 भानुमंत भगवंत भूतिभूषन भुजंगवर ॥  
 भव्य भावबल्लभ भवेस भव-भार-विभंजन  
 भूरिभोग भैरव कुजोगगंजन जनरंजन ॥  
 भारती-बदन विष-अदन सिव ससि-पतंग-पावक-नयन।  
 कह तुलसिदास किन भजसि मन भद्रसदन मर्दनमय ॥  
 नागो फिरै कहै मागनो देखि न खाँगो कछू, जनि मागिये थोरो।  
 राँकनि नाकप रीझि करै तुलसी जग जो जुँरै जाचक जोरो ॥

नाक संवारत आयो हौं नाकहि, नाहिं पिनाकिहि नेकु निहोरो।  
 ब्रह्मा कहै, गिरिजा! सिखवो पति रावरो, दानि है बावरो भोरो ॥  
 विषु पावकु ब्याल कराल गरें, सरनागत तौ तिहुँ ताप न डाढे ॥  
 भूत बेताल सखा, भव नामु दलै पलमें भवके भय गाढे ॥

१४०

तुलसीसु दरिद्रु-सिरोमनि, सो सुमिरें दुख-दारिद होहिं न ठाढे।  
 भौनमें भाँग, धतुरोई आँगन, नागेके आगें हैं मागने बाढे ॥  
 सीस बसै बरदा, बरदानि, चढ्योबरदा, धरन्यो बरदा है।  
 धाम धतूरो, बिभूतिको कूरो, निवासु जहाँ सब लै मरे दाहैं ॥  
 ब्याली कपाली है ख्याली, चहूँ दिसि भाँगकी टाटिन्हके परदा हैं।  
 राँकसिरोमनि काकिनिभाग बिलोकत लोकप को करदा है ॥  
 दानि जो चारि पदारथको, त्रिपुरारि, तिहूँ पुरमें सिर टीको।  
 भोरो भलो, भले भायको भूखो, भलोई कियो सुमिरें तुलसीको ॥  
 ता बिनु आसको दास भयो, कबहूँ न मिट्यो लघु लालचु जीको।  
 साधो कहा करि साधन तैं, जो पै राधो नहीं पति पारबतीको ॥

१४१

जात जरे सब लोक बिलोकि तिलोचन सो विषु लोकि लियो है।  
 पान कियो विषु, भूषन भो, करुनाबरुनालय साइँ-हियो है।  
 मेरोइ फोरिबे जोगु कपारु, किधौँ कछु काहूँ लखाइ दियो है  
 काहे न कान करौं बिनती तुलसी कलिकाल बेहाल कियो है ॥  
 खायो कालकूटु भयो अजर अमर तनु,  
 भवनु मसानु, गथ गाठरी गरदकी।  
 डमरु कपालु कर, भूषन कराल ब्याल,  
 बावरे बडेकी रीझ बाहन बरदकी ॥  
 तुलसी बिसाल गोरे गात बिलसति भूति,  
 मानो हिमगिरि चारु चाँदनी सरदकी।  
 अर्थ-धर्म-काम-मोच्छ बसत बिलोकनिमें,  
 कासी करामाति जोगी जागति मरदकी ॥

पिंगल जटाकलापु माथेपै पुनीत आपु,  
पावक नैना प्रताप भ्रूपर बरत है।

१४२

लोयन बिसाल लाल, सोहै बालचंद्र भाल,  
खंठ कालकूट, ब्याल-भूषन धरत है ॥

सुंदर दिगंबर, बिभूति गात, भाँग खात,  
रूरे सुंगी पुरें काल-कंटक हरत हैं।  
देत न अघात रीझि, जात पात आकहीकें  
भोरानाथ जोगी जब औढर ढरत हैं ॥

देत संपदासमेत श्रीनिकेत जाचकनि,  
भवन बिभूति-भाँग, वृषभ बहनु है।  
नाम बामदेव दाहिनो सदा असंग रंग  
अधर्द अंग अंगना, अनंगको महनु है ॥

तुलसी महेसको प्रभाव भावहीं सुगम  
निगम-अगमहूको जानिबो गहनु है।  
भेष तौ भिखारको भयंकररूप संकर  
दयाल दीनबंधु दानि दारिददहनु है ॥

१४३

चाहै न अनंग- अरि एकौ अंग मागनेको  
देबोई पै जानिये, सुभावसिध्द बानि सो।  
बारि बुंद चारि त्रिपुरारि पर डारिये तौ  
देत फल चारि, लेत सेवा साँची मानि सो ॥

तुलसी भरोसो न भवेस भोरानाथको तौ  
कोटिक कलेस करौ, मरौ छार छानि सो।  
दारिद दमन दूख-दोष दाह दावानल  
दुनी न दयाल दूजो दानि सूलपानि-सो ॥

काहेको अनेक देव सेवत जागै मसान  
खोवत अपान, सठ होत हठि प्रेत रे।  
काहेको उपाय कोटि करत, मरत धाय,

जाचत नरेस देस- देसके, अचेत रे  
तुलसी प्रतीति बिनु त्यागै तैं प्रयाग तनु,  
धनहीके हेत दान देत कुरुखेत रे।  
पात द्वै धतूरेके दै, भोरें कै, भवेससों,  
सुरेसहूकी संपदा सुभायसों न लेत रे॥

१४४

स्यंदन, गयंद, बाजिराजि, भले भले भट,  
धन-धाम-निकर करनिहूँ न पूजै कै।  
बनिता बिनीत, पूत फावन सोहावन, औ  
बिनय बिबेक, बिद्या सुभग सरीर ज्वै ॥  
इहाँ ऐसो सुख, परलोक सिवलोक ओक,  
जाको फल तुलसी सो सुनौ सावधान है।  
जानें, बिनु जानें, कै रिसानें, केलि कबहुँक  
सिवहि चढाए हैहैं बेलके पतौवा द्वै ॥  
रति-सी रवनि, सिंधुमेखला अवनि पति  
औनिप अनेक ठाढे हाथ जोरि हारि कै।  
संपदा-समाज देखि लाज सुरराजहूकें  
सुख सब बिधि बिधि दीन्हैं, सवारि कै ॥

इहाँ ऐसो सुख, सुरलोक सुरनाथपद,  
जाको फल तुलसी सो कहैगो बिचारि कै।  
आकके पतौआ चारि फूल कै धतूरेके द्वै  
दीन्हैं हैहैं बारक पुरारिपर डारिकै ॥

१४५

देवसरि सेवौं बामदेव गाउँ रावरेहीं  
नाम रामहीके मागि उदर भरत हौं।  
दीबे जोग तुलसी न लेत काहूको कछुक,  
लिखी न भलाई भाल, पोच न करत हौं ॥  
एते पर हूँ जो कोऊ रावरो है जोर करै,  
ताको जोर, देव! दीन द्वारें गुदरत हौं।

पाइ कै उराहनो उराहनो न दीजो मोहि ,  
 कालकला कासीनाथ कहें निबरत हौं  
 चेरो रामराइको, सुजस सुनि तेरो, हर!  
 पाइ तर आइ रह्यौं सुरसरितीर हौं।

१४६

बामदेव! रामको सुभाव-सील जानियत  
 नातो नेह जानियत रघुबीर भीर हौं ॥  
 अधिभूत बेदन विषम होत, भूतनाथ  
 तुलसी बिकल, पाहि! पचत कुपीर हौं।  
 मारिये तौ अनायास कासीबास खास फल,  
 ज्याइये तौ कृपा करि निरुजसरीर हौं ॥

जीबेकी न लालसा, दयाल महादेव! मोहि,  
 मालुम है तोहि, मरिबेईको रहतु हौं।  
 कामरिपु ! रामके गुलामनिको कामतरु!  
 अवलंब जगदंब सहित चहतु हौं ॥

रोग भयो भूत-सो, कुसूत भयो तुलसीको,  
 भूतनाथ, पाहि! पदपंकज गहतु हौं।  
 ज्याइये तौ जानकीरमन-जन जानि जियँ  
 मारिये तौ मागी मीचू सूधियै कहतु हौं ॥

१४७

भूतभव! भवत पिसाच -भूत- प्रेत -प्रिय,  
 आपनो समाज सिव आपु नीकें जानिये।  
 नाना बेष, बाहन, बिभूषन, बसन, बास,  
 खान -पान, बलि-पूजा विधिको बखानिये ॥  
 रामके गुलामनिकी रीति, प्रीति सूधी सब,  
 सबसों सनेह, सबहीको सनमानिये।  
 तुलसीकी सुधरै सुधारे भूतनाथहीके  
 मेरे माय बाप गुरु संकर-भवानिये ॥  
 काशीमें महामारी

गौरीनाथ, भोरानाथ, भवत भवानीनाथ ।  
 बिस्वनाथपुर फिरी आन कलिकालकी ।  
 संकर-से नर, गिरिजा-सी नारीं कासीबासी,  
 बेद कही, सही ससिसेखर कृपालकी ॥  
 छमुख-गनेस तें महेसके पियारे लोग  
 बिकल बिलोकियत, नगरी बिहालकी ।

१४८

पुरी-सुरबेलि केलि काटत किरात कलि  
 निठुर निहारिये उघारि डीठि भालकी ॥  
 ठाकुर महेस ठकुराइनि उमा-सी जहाँ,  
 लोक-बेदहूँ बिदित महिमा ठहरकी ।  
 भट रुद्रगन, पूत गनपति-सेनापति,  
 कलिकालकी कुचाल काहू तौ न हरकी ॥  
 बीसीं बिस्वनाथकी विषाद बडो बारानसीं,  
 बूझिए न ऐसी गति संकर-सहरकी ।  
 कैसे कहै तुलसी वृषासुरके बरदानि  
 बानि जानि सुधा तजि पीवनि जहरकी ॥

२

लोक-बेदहूँ बिदित बारानसीकी बडाई  
 बासी नर नारि ईस-अंबिका-सरूप हैं ।

१४९

कालनाथ कोतवाल दंडकारि दंडपानि,  
 सभासद गनप-से अमित अनूप हैं ॥  
 तहाऊँ कुचालि कलिकालकी कुरीति, कैधौं  
 जानत न मूढ इहाँ भूतनाथ भूप हैं ।  
 फलें फूलैं फैलैं खलल, सीदै साधु पल-पल  
 खाती दीपमालिका, ठठाइयत सूप हैं ॥  
 पंचकोस पुन्यकोस स्वारथ-परमारथको

जानि आपु आपने सुपास बास दियो है।  
नीच नर-नारि न सँभारि सके आदर,  
लहत फल कादर विचारि जो न कियो है ॥

बारी बारानसी बिनु कहे चक्रपानि चक्र,  
मानि हितहानि सो मुरारि मन भियो है।  
रोसमें भरोसो एक आसुतोस कहि जात  
बिकल बिलोकि लोक कालकूट पियो है ॥

१५०

रचत बिरंचि, हरि पालत, हरत हर  
तेरे हीं प्रसाद अग- जग-पालिके।  
तोहिमें बिकास बिस्व ,तोहिमें बिलास सब,  
तोहिमें समात, मातु भूमिधरबालिके ॥

दीजे अवलंब जगदंब ! न बिलंब कीजे,  
करुनातरंगगिनी कृपा-तरंग-मालिके।  
रोष महामारी, परितोष महतारी दुनी  
देखिये दुखारी, मुनि-मानस-मरालिके ॥

निपट बसेरे अघ औगुन घनेरे, नर-  
नारिऊ अनेरे जगदंब! चेरी-चेरे हैं।  
दारिद-दुखारी देवि भूसुर भिखारी-भीरु  
लोब मोह काम कोह कलिमल घेरे हैं ॥

लोकरीति राखी राम, साखि बामदेव जानि  
जनकी बिनति मानि मातु ! कहि मेरे हैं।  
महामारी महेसानि! महिमाकी खानि, मोद-  
मंगलकी रासि, दास कासीबासी तेरे हैं ॥

१५१

लोगनिकें पाप कैधौं, सिध्द-सुर-साप कैधौं,  
कालकें प्रताप कासी तिहूँ ताप तई है।  
ऊँचे, नीचे, बीचके, धनिक, रंक, राजा, राय  
हठनि बजाइ करि डीठि पीठि दई है ॥

देवता निहोरे, महामारिन्ह सों कर जोरे,  
 भोरानाथ जानि भोरे आपनी-सी ठई है।  
 करुनानिधान हनुमान वीर बलवान !  
 जसरासि जहाँ-तहाँ तैंहीं लूटि लई है ॥

संकर-सहर सर, नरनारि बारिचर  
 बिकल, सकल, महामारी माजा भई है।  
 उछरत उतरात हहरात मरि जात,  
 भभरि भगात जल-थल मीचुमई है ॥

देव न दयाल, महिपाल न कृपालचित,  
 बारानसीं बाढति अनीति नित नई है ।

१५२

पाहि रघुराज ! पाहि कपिराज रामदूत !  
 रामहूकी बिगरी तुहीं सुधारि लई है ॥

एक तै कराल कलिकाल सूल-मूल, तामें  
 कोढमेंकी खाजु-सी सनीचरी है मीनकी।  
 बेद-धर्म दूरि गए भूमि चोर भूप भए,  
 साधु सीचमान जानि रीति पाप पीनकी ॥

दूबरेको दूसरो न द्वार, राम दयाधाम!  
 रावरीए गति बल-बिभव बिहीन की।  
 लागैगी पै लाज वा बिराजमान बिरुदहि,  
 महाराज ! आजु जौं न देत दादि दीनकी ॥

विविध

रामनाम मातु-पितु, स्वामि समरथ, हितु,  
 आस रामनामकी, भरोसो रामनामको।

१५३

प्रेम रामनामहीसों, नेम रामनामहीको,  
 जानौं नाम मरम पद दाहिनो न बामको ॥

स्वारथ सकल परमारथको रामनाम,  
 रामनाम हीन तुलसी न काहू कामको।

रामकी सपथ, सरबस मेरें रामनाम,

कामधेनु-कामतरु मोसे छीन छामको ॥

मारग मारि, महीसुर मारि, कुमारग कोटिककै धन लीयो।  
संकरकोपसों पापको दाम परिच्छित जाहिगो जारि कै हीयो ॥  
कासीमें कंटक जेते भये ते गे पाइ अघाइ कै आपनो कीयो।  
आजु कि कालि परों कि नरों जड जाहिगे चाटि दिवारीको दीयो ॥

कुंकुम -रंग सुअंग जितो, मुखचंदसो चंदसों होड परी है।  
बोलत बोल समृद्धि चुवै, अवलोकत सोच-विषाद हरी है ॥  
गौरी कि गंग बिहंगिनिबेष, कि मंजुल मूरति मोदभरी है।  
पेखि सप्रेम पयान समै सब सोच-बिमोचन छेमकरी है ॥

१५४

मंगलकी रासि, परमारथकी खानि जानि  
बिरचि बनाई बिधि, केसव बसाई है।  
प्रलयहूँ काल राखी सूलपानि सूलपर,  
मीचुबस नीच सोऊ चाहत खसाई है ॥

छाडि छितिपाल जो परीछित भए कृपाल,  
भलो कियो खलको, निकाई सो नसाई है।  
पाहि हनुमान! करुनानिधान राम पाहि!  
कासी-कामधेनु कलि कुहत कसाई है ॥

बिरची बिरंचकी, बसति बीस्वनातकी जो,  
प्रानहू तें प्यारी पुरी केसव कृपालकी।  
जोतिरूप लिंगमई अगनित लिंगमयी  
मोच्छ बितरनि, बिदरनि जगजालकी ॥

देबी-देव-देवसरि-सिध्द-मुनिवर-बास  
लोपति-बिलोकत कुलिपि भोंडे भालकी।  
हा हा करे तुलसी, दयानिधान राम ! ऐसी  
कासीकी कदर्थना कराल कलिकालकी ॥

१५५

आश्रम-बरन कलि विवस विकल भए

निज-निज मरजाद मोटरी-सी डार दी।  
संकर सरोष महामारिहीतें जानियत,  
साहिब सरोष दुनी-दिन-दिन दारदी ॥  
नारि-नर आरत पुकारत, सुनै न कोऊ,  
काहूँ देवतनि मिलि मोटी मूठि मारि दी।  
तुलसी सभितपाल सुमिरें कृपालराम  
समय सुकरुना सराहि सनकार दी ॥  
(इति उत्तरकाण्ड)

---

*gosvaamii tulasidaasa kRita kavitali*  
pdf was typeset on January 21, 2023

---

Please send corrections to [sanskrit@cheerful.com](mailto:sanskrit@cheerful.com)

